

MADCOŠËN DADA UAID

Bëyuc choshon Uanën Esus chote chiaid
(*Mat. 3.1-12; Duc. 3.1-18; Uan 1.19-28*)

1 ¹Madcos nebi. Nuquin Papan tantiampicpadquieac aton madombo Esus abi yacno matses yuedquid chote tauamboen chiaid bëda chuinu. Tantia.

²Abi aton mado Esus chieac onquiaid Nuquin Papan Isayas dada uamiampid nad iquec:

“Naden naimbique. Tantia, mado. Mibi chotequid chuibanquidba chomendambi. Aidën chuibanac ambi tantiaid icsa ënshun mibi cainquidombo iquendac, mado.

³Shubu nibëdacnoshon comapenec onquequin mibi chotequid aidën chuibanendac naden:

Nuquin Icho choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chieac onquiaid Nuquin Papan Isayas dada uamiampid nec.

⁴Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tantiaquidquiao icsho mibi cuidenquiao yec mibi icsaid Nuquin Papa bëpiscudendac quequin chuibampondash. Aden chuibanquimbi

ambi chiacpadomboen naquid acten mentobampondash Uanën. ⁵Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiashien, Icsapobi, quec abi icsaid chieac utsi-utsieac onquecuededpondash. Aden abi icsaid chuibanquidtedictsëqui Uanën acte Odan caidën mentobampondash. ⁶Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaid tsuquid niondash. Shioshbimboecquid shuishun pequid niondash. Bacun chequid niondash. ⁷Aidëmbi naden chuibampondash: —Con tsyuecquid choendac. Aidi nadatiambocquin naquidquiao nendac. Aidi bëdamboshëcquid icnuc ëbi icsaquid icsho ëtatotsieshun aid choec quequin chuiquidquiao Nuquin Papan icmioshi? quec tsadebi. ⁸Mibi acten mentoquid nebi; aidien abipadquiocquid aton Mayan menianquidquiao nendac —quepondash Uan.

Esus acten mentoaid
(*Mat. 3.13-17; Duc. 3.21-22*)

⁹Adnubien ambi chian-chianaidquiao Esus chopondash. Nidaid Cadidia caid shubu dadpen icquid Nasaded caid

yacnoësh chopondash. Adshobien
Uanën Esus acten mentopondash.

¹⁰Aden acten mentoac Esus
pudundonobi abu bécadoacnoëshquio
dëbimbimboec isadquid
abipadquiocquid aton Mayan
bede-bedequemboec Esusbëd icnuec
budpondash. ¹¹Aden budmetanec ambi
bécadoacnoëshi: —Mibentsëcquiobi
icsho ëmbi tantiaidquio mibi nec, mado.
Ëmbi bédamboen isaidquio mibi nec
—quepondash aton Papa Esus chiec.

**Esus Nuquin Papan chiaid
niacmenuequin Satanasën tanaid**

(Mat. 4.1-11; Duc. 4.1-13)

¹²Aden chuibon budmeboed Mayanën:
—Shubu nibëdacno nid —cac nidash
Esus tsadpondash abentsëcquiobi.

¹³Ambo tsadquimbi ushë abentsëc
nidmec utsi choaid abutometsëcquiec
tabadpondash. Ambo tabadshobi
Nuquin Papan chiaid niacmenuequin
tanu quianec mayan icsan icbo Satanas
caid chopondash. Aden tanaqui
niaquesambo yec tsadpondash. Adec
tsadnubi nidpondash Satanas. Ambobi
bëdi nibëdquid deon caid chedo
icpondash. Ambo tsadshobi ambi uaido
mayan bédabon cho-choshon
nashumbededpondash.

**Cadidia yacnoshon
tauamboen chuibanaid**

(Mat. 4.12-17; Duc. 4.14-15)

¹⁴Ambo yuec tabadash Esus
choambien isadaidpembo ancaquidën
acten mentoanquid Uan bedmeshun
quënën nauedmepondash. Uan
nauedmiambi nidaid Cadidia caid yacno
nidshun Nuquin Papa yacno shubu
abentsëquën tabadte iquec quequin
Esusën chuibampondash. ¹⁵—Nuquin
Papan chiampidpadquid abi yacno
yuedanquid nëmbobi iqueque. Mibi

icsaid ënshun ëmbi chiaid bëda tantiaa
—quepondash Esus comapenec onquec.

Ëbëd iquec cho Esusën abia caido

(Mat. 4.18-22; Duc. 5.8-11)

¹⁶Aden chuibanashic chian Cadidia
caid cuëman capupondash. Ambo
capuquin Petedo Simombëdtan aton
utsin Andedesën nëshaid acte
nënebansho istuidpondash. Aid daëdi
nuëcquid bedquid niondash. ¹⁷Aden
nuëcquid bednuen nëshaid nënesho isec:
—Nëshaidën nuëcquid bedquid icboedi
nëbi Nuquin Papa yacno yuedanquid
iquec quequin chuitequid mibi
icmembique. Ëbëd iquec cho
—quepondash Esus. ¹⁸Adsho tantiaish
nëshaid abëd icquid menianec abi
chuiquidbëd nidanepondash.

¹⁹Adanec udictsëc nidanequin
Sebedeyon mado daëd Acobobëdta Uan
Esusën istuidpondash. Aidon aton
nëshaid nacenmpondash cano
antabëdquin. ²⁰Aden nacenesho isun
Esusën ambi utsi chuibocpadomboen
chiaquien aid daëdshuntsen aton
papabëd aton yua cano antabëdsho
nianec Esusbëd nidanepondash.

Mayan icsa Esusën dapuduemiaid

(Duc. 4.33-37)

²¹Adashic chian Cadidia caid
yacnoësh nidequi shubu dadpen icquid
Capednaun caid yacno Esusbëd icquido
chopondash. Choash chonoadtemaid
ushë icnuc ënapen capuenquio yec
Nuquin Papan chiaid chuibante shubun
puduedpondash. Puduedshun
iccuededquido Nuquin Papan chiaid
Esusën chuipondash. ²²Aden chuisho
tantiaishun: —Ambia tantiaquidën
chiacpadomboen Esusën chuibanec.
Utsimbien adomboen chienquio iccosh
—quec onquec tabadcuededpondash.

²³Aden Esusën chuisho tantianubien

mayan icsa dapuduedaid
tsadacnoëshquiobi comapenec
onquiampondash: ²⁴—Esus Nasaded
yacnoësh choquid mibëd icquidpenquo
nebique. Nidec nid. ðChian
anëdënquiagno ëbitedi nidmenuecta
cho? Nuquin Papan Madombo icsaisa
nec quequin ëmbi tantiaid mibi nec
—quec mayan icsa dapuduedtsaid
onquepondash. ²⁵Adoaquien:
—Otaquio tabad —quetanquin:
—Dapuduen —capondash Esusën.
²⁶Adoac comapenec abi dapuduedaid
uëdëquenuc sidquianec
dapuduempondash.

²⁷Adsho isash: —ðAbimbodambi ispo?
ðMitsipadquidquo nepec? Ambi
tantiamiaid utsien nechitec. Chuiquidën
nacpadomboen naid nec. Dapuduen,
ambi cac ambi chiapadomboen mayan
icsan naic —quec onquecuededpondash
Esusën naid chieci. ²⁸Adec
onquecuededash auëshquio nidaneshun
ambi isboed, Esusën naid,
chuibampondash. Aden chuibansho
nidaid Cadidia caid
yacnocquidtedishuntsen
tantiabededpondash.

Simonën nachi bëdamaiaid
(Mat. 8.14-15; Duc. 4.38-39)

²⁹Ambi chuisho tantiaboedo
nidanenubien Petedo Simon caidën
shubu yacno Esus Acobo Uan aidtedi
nidpondash. Aidën shubun icquidbidi
aton utsi Andedes icpondash. ³⁰Aidën
shubun icquidbidi Simonën nachi
icpondash. Ambo Simonën nachi
chumbo yec uepondash. Ambobi Esus
choshos isun utsin chuipondash chumbo
iquec quequin. ³¹Aden chiaquien
Simonën nachi yacnombo choshon
Esusën mëdinquin uëtsëndoac abi
chumbo yaid badedquo bëdampondash.
Adec bëdanash nidtoshon codocashun

abi choquidtedi pemebampondash
Simonën nachin.

Esusën dadpen bëdamaiaid
(Mat. 8.16-17; Duc. 4.40-41)

³²Adnubien inchëshbudtsëqui
Capednaun caid yacnocquidën
daicsaidtedi bë-bëpondash. Adembidi
mayan icsa dapuduedaidtedi
bë-bëpondash. ³³Bë-bëash Simonën
shubu shëcuë cuëmano puduedabi
tabadcuuededpondash. ³⁴Adsho isun
daicsaidtedi Esusën
bëdamebampondash. Adembidi mayan
icsa dapuduedaid
dapuduemebampondash
oncamenquiocquin. Nuquin Papan
Madombo abi yacno yuedmianquid
abentsëcquiobi mibi nec quequin
chuinushe queshun
oncamenquiocpondash.

**Shubu nibëdacno Nuquin Papabëd
onque Esus onquiaid**
(Duc. 4.43-44)

³⁵Adashic badiadte anoentsëqui
yanubi isucunanec puduanec shubu
nibëdacno Esus nidpondash. Nidec
tabadtuidshun Nuquin Papabëd
onquequin chuibampondash. ³⁶Esus
nidacshobi isucunshun Petedo
Simombëd icquidën nibënampondash.
³⁷Aden nibënquin istuidashi: —Mibi
isec cho-choquidtedishun mibi
nibëmbededec —quepondash Esus caic.
³⁸Adoaquien Esus: —Capucuenequin
utsibotsen Nuquin Papan shubu
abentsëquën yuedanquid iquec quequin
chuibenec chobique. Shubu utsi-utsiec
dadpen yacno nidnu. Nid
—quepondash. ³⁹Aden chuibidanec
nidaid Cadidia caid yacno capuequi
shubu dadpen yacno choshon Nuquin
Papan chiaid chuibante shubun
puduedshun Nuquin Papa yacno shubu

abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuiapoondash. Adembidi mayan icsa dapuduemeoapondash.

**Nami mishac tantiadenquiocquid
bëdamiaid**

(Mat. 8.2-4; Duc. 5.12-13)

⁴⁰Aden Esusën chuibanubien daushac bimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bëdame —quequin Esus chiec comapenec cuëdpondash.

⁴¹Adec cuëdshobi nëid isash unësquio iquebi quequin ëquëducshun tantiaquin mishec Esus: —Mibi bëdamembique. Bëdambo icta ⁴²—quenubi daicsaid nibëdquio yec bëdampondash.

⁴³Aden bëdametanquin nidmepondash: —Nidec nid.

⁴⁴Nidquimbi, Esusën bëdamioshi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bëdambo icquin anocquid, Nuquin Papa matses chiec onquianequid, isme. Adoshon dëbimbi ecquid daëd meneta Moisesën chiapadomboen ma anocquidën napanueshun. Aden meniac abentsëc cuesuneshun utsi cuesunenu quenquiocquid cuesuniadën intac puntanequin intac mibi daseccashun dëbimbi ecquid utsi cuemeshun naden aidën mibi chuipec. Nuquin Papan mibi bëdamboen istiapi mbocboedi nëbi bëdamboen mibi isendac. Aden chuiquin mibi bëdamiaid Nuquin Papan naid nec quequin tantiatsiash —quepondash Esus ambi bëdameboed chiec. ⁴⁵Adsho tantiaboshombi

niachbidanquin Esusën bëdamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibëdacno capupondash. Adnubien Esus nibënec nidaid utsi-utsiec yacnoësh dadpen cho-chopondash.

Cuembo yec uishquiaid Esusën bëdamiaid
(Mat. 9.2-8; Duc. 5.18-26)

2 ¹Adashic Capednaun yacno nidoash shubun puduedpondash Esus. Adnubien, Esus chosh qesho tantiash padpidec dadpen cho-choapondash.

²Dadpen cho-choash puduedash tsucus-tsucustsëcquio yec tabadnubi adecbidi shëcuë cuëmano tabadpondash. Adec tabadsho isun Esusën Nuquin Papa yacno shubu abentsëquën tabadte iquec quequin chuibampondash. ³Adnubien cuembo yec uishquiaid bëec dada daëd-daëdquieç 4ted cho-chopondash.

⁴Cho-choshon matses tsucus-tsucustsëcquio yec tabadsho isun dectatoshon macano nacnenaid chic-chictanquin Esusën dayunquio uishquiaid imbudpondash. ⁵Aton dayunquio imbudsho isun Esusën bëdamec quequin abi imbudboedën tantiec quequin ambibi tantiapondash Esusën. Adashic: —Mado, mibi cuidenquio yec mibi icsaid bëpiscudobi —quepondash Esus.

⁶Adnubien isadaidbo tsusedpabon nadomboen nata quequin chiaid tantiamequid on ambobi tabadquin naden onquenquiocquid icsamboen tantiapondash. ⁷¿Atotsi quiaish adec Esus onquepeque? Tantanu. Nuquin Papa icsamboen chuiquidien aid nechitec. Nuquin Papauidi matses cuidenquio yec abi icsaid bëpiscudquid nec, quetsëcquieç tabadpondash.

⁸Aidon tantiaid tantiec nadpondash Esus: —¿Atotsieshun aden mimbi icsamboen tantiap? ⁹¿Mibi cuidenquo yec mibi icsaid bēpiscudobi quequin ěmbi chiaidquo bēdantequidpenda nedic? Adecbidi, ¿Mibi icsambocboedi mibi bēdanoque. Nidtoson mibi imbudboed chiadtoson buanec nid quequin ěmbi chiaid bēdantequidpembidida neoadic? ¹⁰Ai, adquidquibidi nec. Mibi cuidenquo yec mibi icsaid bēpiscudobi queboed chidon tishac matses yanaid yequi chuiquidquo Esus nec quequin tantiesabo mibi nepes. Adquid icscho ěbi tantiamenuequin ¹¹cuembo yec uishquiaid naden chiembique Tania. Mibi icsambocboedi mibi bēdamiombique. Nidtoson mibi imbudboed chiadtoson buanec nid —capondash Esusē. ¹²Adoquien nidtoson abi imbudboed chiadtoanquin buampondash. Aden buansho isash: —Nideque. Is. Adomboen nasho isamboccondambi —quetsēcquieq onquiash Nuquin Papan naid nec quec cuēdēncuededpondash.

Ěbēd iquec cho Esusē Debi caid
(*Mat. 9.9-13; Duc. 5.27-32*)

¹³Adashic padpidec chian Cadidia caid cuēmano nidoapondash Esus. Ambobi tabadnubien aidēn chiaid tantianuec matses dadpen cho-choapondash. Cho-choasho isun Nuquin Papan chiaid chuibanoapondash Esusē. ¹⁴Aden chuibanec nidquimbi Debi, Adpeon madombo, tsadsho istuidpondash. Aidi Mateybidi cuēnondash. Nidaid utsi yacno aton na utsibon buan-buansho isun piucquid bedshunquid Debi nepondash. Adembidi nidaid utsi yacnoshon aton na bē-bēsho isun piucquid bedshunoquid Debi nepondash. Isadaidpemboc ancaquidēn,

Con matsespembon piucquid bedshunta, cac bedshunoquid Debi nepondash. Adshobien: —Ěbēd iquec cho —Esusē cac: —Ai, mibēd nidnu. Nid —quianec badedi Esus tsibananeq Debi nidpondash.

¹⁵Adshumbic Debin shubuno nidshun Esusbēd icquidon pepondash. Ashunquibidi aton na buansho isun piucquid bedshunquid Debipadquidēn utsin-utsinquien pepondash. Ashunquibidi isadaidbo tsusedpabon nadomboen nata quequin chiaid naisan utsin-utsinquien pepondash. Debin shubuno Esus tsibanec choquid dadpen icpondash. ¹⁶Aden adquidbēdtan Esusēn pesho isun isadaidbon nadomboen nata quequin chiaid tantiamequid padiseyobo caid: —¿Atotsieshun piucquid bedshunquidbēdtambi isadaidbon nadomboen nata quequin chiaid naisabēdtambi mibi chuiquidēn pepec? Tantanu. Ěbi chui —quepondash padiseyobo Esusbēd icquido chieq.

¹⁷Adsho tantiashien Esus: —¿Dada bēdambocquidta dauēchoquidēn bēdametequid nedic? Padenquo. Daicsaidien dauēchoquidēn bēdamec. Adquiecbidi, icsaisa nebi quequin ambibi tantiaquid icscho mibi icsaid ěnta. Aden ěnash ěbēd icquid mibi iquendac quequin chiesha nebi. Icsaquid nebi qeshun mibi icsaid ěnta. Aden ěnash, ěbēd icquid mibi iquendac quequin chuiquid nebi —quepondash Esus.

¿Atotsi quiaish mibēd icquid buna mēmunesa nec? quiaid
(*Mat. 9.14-17; Duc. 5.33-39*)

¹⁸Adnubien abi chuiquid quēnēn nauedan aid tantiec unēsquiocquin Uan acten mentoanquidbēd icquidēn buna mēmunubi padiseyobobēd icquidon

unësaid tantiec unësqiocrin buna
mëmunoapondash. Aden buna
mëmunsho isanec nidequi Esus yacno
nidash Esusbëd icquidon buna
mëmunenquo icsho isash utsibo:
—¿Atotsieshun Uambëd icquidon
adembidi padiseyobëd icquidon buna
mëmunubi mibëd icquidon buna
mëmunenquo icpec? Tantianu. Chui
—quepondash.

^{19,20}Adoquien Esus: —Aton chido
bednun pambid meniac chidon
codocacsho abi inquidën abëd icquido
menec. Aden meniac isuidesa abëd
icquido nec. Adecbidi ëbi abi chuiquid
icnuc ëbëd icquidon buna
mëmunenquocrin isuidenquo iquec.
Yuecash chido inquid nibëdanan abëd
icboedo unësqiocrin buna
mëmunquin isuidpec. Adecbidi ëbi
nibëdanan ëbëd icboedo unësqio
yampec.

²¹“Adembidi dashcute shënbëdta
chucambocquid bëtuscaisa matses nec.
Shënbëdta chucambocquid bëtuscatsaid
amëec canchedoaic. Adecbidi abi icsaid
ënese tantiaid bëda pausudtiapimbo yec
icsabudec. ²²Adembidi dadpen icquid
chodo uashun sandoec. Adotanquimbic
istuidshun chuca uain chodo uashun
sandoaic. Chodo shënin icsa sandoshon
nequid bëenquocrin. Adecbidi Nuquin
Papan tantiacpadec pausudnu queshun
mibi icsaid ënacsho isun Nuquin Papan
pausunendac —quepondash Esus.

Chonoadtemaid ushë icbo nebi quiaid

(Mat. 12.1-8; Düc. 6.1-5)

²³Adnubien chonoadtemaid ushë utsi
icnuc ënapen capuenquocrin tied
matanquin adosbiecquid trico caid ëshë
bedshun Esusbëd icquidon pepondash.

²⁴Adshobien: —Mibëd icquido is.
Chonoadtemaid ushën chonoadeque.
Abi chuiquid mibi iquec ¿atotsi quish,

Padi. Chën, quenquo ique?
—quepondash padiseyobo Esus caic.

²⁵Adoquien Esus: —¿Chuiquid
Dabidbëd icquidon natia bunquin ambi
petemaid pepondash quequin dada
uapampid tantiamboda icconda? ²⁶Nad
icpampic. Abëd icquidobëd yuec
capuash Dabid comapenec
bundopampic. Bundoash Nuquin Papa
tabadte shubu uashunaid yacno choash
puduedtemaid quënën puduedshun
Nuquin Papa tantianuequin pan meniac
sanaid bedshun ambi petemaid abëd
icquidobëdtambi abi chuiquidën
Dabidën pepampic. Puduedtemaid
quënën puduedquid, Nuquin Papa
matses chiec onquianequid, Abiatad
abentsëqui icnubi aid quënën
puduedshun bedshun Dabidën
pepampic. Abiatadpadquidën
peteuidtsëqui nec quenquocrin abëd
icquido tantiaquin pan bedshun
aidobëdtambi pepampic chuiquid dapa
Dabidën —quepondash Esus padiseyobo
caic.

²⁷Aden chuishumbic naden
padiseyobo Esusën chuiapondash:
—Nabanash tiboedte matses bumpec
quequin tantiaquin abitedi uabanquin
ënashini con pabëdi tiboquepampic.
Adashic yuecash, Chonoadtemaid ushë
nec, quepadenebi con pabëdi. Aden
chiequi matses tiboedte ushë aton icbo
ictiapimbo iquec. ²⁸Aid ushë icbo icquin
ëbëd icquidon bunquin pebededsho
isash, Padi. Chonoadtemaid ushë neque.
Aden penda, quenquiocobi
—quepondash Esus abi chieshënuquido
padiseyobo chiec.

Mëuesadaid Esusën bëdamiaid

(Mat. 12.9-14; Düc. 6.6-11)

3 ¹Adashic padpidec Nuquin Papan
chiaid chuibante shubun Esus
puduedpondash. Ambo dada

mëuesadaid tsadnubi ²Esus chieshënnquid padiseyobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bédamepeque. Nëid badiadën bédamesho isun bedmeshun quënën nauedmenu quetsëcquie padiseyobo tabadcuededpondash. ³Aden tantiec padiseyobo tabadnubien mëuesadaid chuiquin Esusën: —Nënantanquio nidto —capondash.

⁴Adoac nënantanquio nidtoash mëuesadaid nidnubi iccuededquido chiec Esus onquepondash: —¿Chonoadtemaid ushën matses tantiaquindambi nape? ¿Adoenquiocquin matses icsa uapendambi ique? ¿Nëid ushëndambi matses bédamepe? ¿Bédamenquiocquindambi cuesunepe? —quepondash. Aden chiec Esus onquenubien onquenquio yec tabadpondash padiseyobo.

⁵Adoaquien nëishtanquimbi abi chieshënnquido bëisbanec Esus, Nuquin Papan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bédampondash. ⁶Adosho isash puduenanec nidquin edodesbo padiseyobon badedquio istuidpondash. Aido istuidash: —Esus cuesunete mibi bunacpadquie bunebi. ¿Mitsipadentsimbi cuesunemenuen bedmepeba? —quecuededpondash padiseyobo.

Esus yacno matses dadpen choaid

⁷Adnubien Esusbéd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash.

⁸Adnubien Esusën nabansho isboedon

chias nidaid Udeya caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantias cho-chopondash. ⁹Adec cho-choash tsucus-tsucustsëcquie yec tabadquin tsicatiac nënantanquio tsadacnoëshi catashnushe quiash Esus: —Cano bec cho —quiampondash abéd icquidquio caic. ¹⁰Dadpen bédamiosh cadoshe. Ëbitsen bédanu quequin ambibi tantiaquin Esus mishbededpondash. ¹¹Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuëdpondash. ¹²Adoaquien: —Padi. Aden ëbi chienda —quepondash Esus.

Abéd 12ted icquid Esusën tantiamenu caid

(Mat. 10.1-4; Duc. 6.12-16)

¹³Adashic macuësh dapa yacno nidnushi abéd 12ted icquido chomeshun nadopondash: ¹⁴Ëmbi tantiacpadomboen mibitedi tantiamembi. Adquid icquin ëbéd tabadquin ëmbi chiacpadomboen mimbi tantiabenendac. Aden tantiabenacsho isun ëmbi chiacpadomboen chuimenuen mibitsen nidmembi. ¹⁵Adembidi mayan icsa dapuduedaid dapuduemequidbidi mibi icmembi quequin abéd icquido Esusën chuipondash. ¹⁶Ambi tantiamenu caid nëidtedi icpondash: Simon cashumbic Esusën Petedo capondash, ¹⁷utsibic

Sebedeyon mado daëd, Acobobëd Uan. Aid daëdi, abu cuëdtequidën mado nec quequin oncain Buanedquis quequin Esusën cuëmpondash. ¹⁸Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. ¹⁹Utsibic Udas Iscadiote, aidi abi chieshënquido Esus bedmenush Esusbëd capuquid nepondash. Aidedi Esusën tantiemequin chuiquin ismiaido niondash.

**Bedtsibu caidën dausunaid
Esus nec quiaid**

(Mat. 12.22-32; Duc. 11.14-12; 12.10)

²⁰Aidedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbëd icquidon penquio icpondash. ²¹Aden penquioscho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

²²Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiemequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduesho isboed Esus chieshënquid yec nadpondash: —Mayan icsan icbo Satanashumbic Bedtsibu caidën tantiamiaid Esus nec. Adquid icquin mayan icsa matses dapuduedaid dapuduemec —quepondash.

²³Adoaquien Esus: —Mimbi icsamboen tantieque. Mibi chuibanu.

Tantieci tabadta. ¿Mayan icsan icbo ambi dapuduedmiaid dapuduequidta nepadic? Padenquio. ²⁴Adquiecbidi shubu icbo abëd icquido cuëshëdmesa nec. ²⁵Icbon abëd icquido cuëshëdmias shubu abentsëquën tabadtiaipimbo iquendac. ²⁶Adembidi ambi dapuduedmiaid dapuduemias adquidën icbo ictiapimbo Satanashuec. Icbo icnuequid abëd icquid puduemesa nec. ²⁷Dadpeshun icbo Satanashuec. Adquid icquin ambi matses dapuduedmiaid dëniacanquidënuidquio nadatiambocquin nabanquin cuemepec. Adquid icquin ëmbi nac mayan icsa dapuduedaid Satanashën yua icboedi icbombo tantieci bëdambo yanec ëbëd iquendac. ²⁸Abimbo chiembique. Tantiata. Matses cuidenquiocquin abi icsaid bëpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsaobi, Papa, qesho tantiashtun Nuquin Papan aid pauquendac. ²⁹Utsien Nuquin Papan Mayan abipadquidën tantiamiac nasho isun Satanashën naid nec qesho pauquenquio iquendac. Adquid ënëdenquio yec icsaquid nendac —quepondash Esus ³⁰Satanashën tantiamiac mayan icsa dapudemequid Esus nec abi caquido chieci.

Esus yacno aton utsibo anibëd choaid

(Mat. 12.46-50; Duc. 8.19-21)

³¹Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chieci. ³²Adoac puduedshun Esus nënantan tsadsho isun: —Titabëd min utsibo choshon umanucshun mibi isnuen cainec —quequin chuituidpondash. ³³Adoaquien Esus: —Adquid utsi chuinu. Tantiata. ³⁴Në tabadquido ëbëd

icquido neque. Is —quepondash Esus abëd iccuededquido chiec. ³⁵Adashic: —Nuquin Papan chiacpadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi —quepondash Esus.

Tantiamequin pete ëshë nësecain chiaid
(*Mat. 13.1-9, 18-23; Duc. 8.4-15*)

4 ¹Adashic padpidec chian cuëmano nidshun Esusën tantiamequin chuibanopondash. Aden chuibanuc cho-choquid dadpen icsho isash cano antabëdtopondash cho-choquid acte cuëmano tabadnubi. ²Adec tabadshobi, matses nadquio iquec quequin tantiaquin tiedën caniquid ëshë Esusën tantiamequin naden chuibampondash: ³—Tied icbo pete ëshë nësecanuec aton tied yacno nidquid. ⁴Adec nësecanuec nidshun pete ëshë nësecac maisec pudun-pudunaid uicchunën chequid. ⁵Adnubien nidaid cuënote dadpen samëdacno utsi-utsiec paëdash badedquio dëyucuidtsash ⁶tapunenquio iquec ushën shoedec. ⁷Adnubien pete ëshë utsi-utsiec nisanquid dëyucacno paëdash dëyucash canidouditsacsho nisanquidën bëtinac podo sinash bacuëtiapimbo iquec. ⁸Adnubien nidaid bëdambo yacno paëdaid dëyucaid caniasht dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec —quepondash Esus.

⁹Aden chiasht: —Ëmbi chuiboed tantianu quiasht bëdamboen tantiec papuedta —quepondash Esus.

¹⁰Aden chuibanash udictsëc Esusbëdi nidshun utsibo choenquiocsho isun databëdtuidquin abëd icquidon: —Mimbi chuibamboed tantianu. Ëbi chui —capondash Esus chuiquin.

¹¹Adoquien: —Nuquin Papan shubun tabadquid tantiamendambi utsiboembi,

Mibi nadquido iquec, quenquiocquin chuibanoc. ¹²Aden chiac:

“Nuquin Papan nabamboed isto-istoboedi ma padenquio tabadteneyoc.

Adembidi tantiado-tantiadoneboedi ma padenquio tabadteneyoc.

Aidon abimbo tantiaquin abi icsaid ëntsiandac. Aden abi icsaid ënsho isun cuidenquio yec Nuquin Papa abi icsaid bëpiscudtsiandac”

—quepondash Esus abëd icquido caic.

¹³Aden chiasht: —¿Mimbtsen ëmbi chuiboed tantienquioda ique? Aidi tantienquiocquin ¿mitsipadentsi adomboembidi chuibanasho mimbi tantiapë? Ëmbi chuiboed nad iqueque. Tantia. Chuinu. ¹⁴Pete ëshë

sequidbimboecquid Nuquin Papan chiaid chuibanquidquio nec. Ëshë ambi siaidbimboecquid Nuquin Papan chiaid nec. Abi paëdacno nidaidbimboecquid matsesën tantiate nec. ¹⁵Nidaidën paëdash pete ëshë dëyuctiapimbocsho uicchunën chiaidbimboec matses utsi-utsiec iquec. Adquid Nuquin Papan chiaid tantiasht papuednu qesho Satanasën bëpiscudmiac tantienquio yanec Nuquin Papa yacno puduedtiapimbo iquec. ^{16,17}Nidaid cuënote dadpen samëdacno pete ëshë paëdash badedquio dëyucuidtsash tapunenquio yec ushën shoedaidbimboec matses utsi-utsiec iquec. Adquid Nuquin Papan chiaid tantiauidash bëdambo iquec queboedi ¿Esus tantiaquid nebi quecta icco? quequin utsibon mamëshunac badedquio tantiesha nebi quendac.

^{18,19}Nisanquid dëyucacno pete ëshë paëdash dëyucash canidouditsacsho nisanquidën bëtinac podo sinash bacuëesabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nënaid, abi

icsaid aitedi tantiaquin Nuquin Papan chiaid tantiesa yanshun bēdamboec tabadaid ismesa yanec. Adquidēn Nuquin Papan chiaid tantiaquid utsi icmetiapimbo iquec. ²⁰Ēshē utsibic nidaid bēdambocquidēn pādēdash dēyucash caniaash dadpen bacuē icquidbimboec matses utsi-utsiec iquendac. Adquid Nuquin Papan chiaid tantiadonec bēdamboec tabadquin utsi ismequid nec. Aden ismiac Nuquin Papan chiaid tantiaquid daēdpactsēc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshē yanendac —quepondash Esus abēd icquido tantiamenuec.

**Tabote nēnantan nanac
chēnquiacbimboec ictiad quiaid**
(Duc. 8.16-18)

²¹Aden chuishumbic abēd icquido naden Esusēn chuipondash: —ĪTabote icbon ambi dayun uaboed taboshon tsadte tēdion nanshun isaidta nedic? Adembidi ĪTabote matsun bētashun isaidta neoadic? Padenquio. Nēnantan tabote nanac chēnquiacbimboec ismenu quec ictiad. ²²Adquiobidi abi yacno yuedanquid ambi dayun uapampidi nēbi Nuquin Papan dayun uainquiocquin ēbi chomeshun ismec. Adembidi con mado chuiban quenquiocboedēmbi nēbi ēbi ismec ma con mado chuibanu quequid con Pa nec. ²³Ambi chiaid tantianu qeshun tantiaquieac papuduedta —quepondash Esus.

²⁴Aden chiash Esus: —Chiaid bēda tantiatequidquio iquec qeshun tantiaquieac papuduedquid icta. Aden chiaiduidi tantiec papuduedquid abipadquid bēdambocquid ambia tantiaquidēn Nuquin Papan mibi icmendac. ²⁵Adquid ambi tantiadoniaidquio iquendac. Aden

tantienquioctśēcquidēn tantiaid bēda uesadendac nibēdquieac —quepondash.

**Ambi siaboed icbon isenquiocnoc
bacuēec quiaid**

²⁶Adec onquequin abēd icquidquio chuishumbic cho-choquidtsen naden Esusēn chuipondash: —Nuquin Papan shubu abentsēquēn tabadec caidaidquio chuibanu. Tantiata. Nidaid bēdan tiedēn caniquid pete ēshē siash ²⁷tabadquin cainquidquio icbo nec. Dadpen ushquin ambi seboed isenquio yec icbo tabadnubi ²⁸ambi seboed dēyucash caniec tautitanec bacuēec. ²⁹Ambi siaid isenquiocnoc canitanec bacuēacsho badedquio bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidēn isenquiocnobi. Papuduedquioshon tantiabeneac. Adquid isash con shubun puduedquido neque. Bednu quependac Nuquin Papa —quepondash Esus.

Mostasa caid ēshē chiaid
(Mat. 13.31-35; Duc. 13.18-19)

³⁰⁻³²Adec onquequin chuibanashic Esus: —Nadquio Nuquin Papan shubun icquido iqueque. Chuinu. Tantia. Mostasa caid pistsēc ēshēmpi ictśēcquid nēsecaid dēyucash nuamboshē caniec cuidi-cuidipambo iquec shubu-shubupambo yec podoec. Ambo uicchunēn shubu uaic. Adomboembidi aton shubun abi tantiaquid dadpen dayun uaquid Nuquin Papa nec —quepondash.

³³Aden chuibanashumbic adomboembidi Esusēn chuibampondash. Aden chuibanash, aitedquio tantiapec abibi qeshumbic aden chiaid chuiquin ēmpondash Esusēn. ³⁴Aden abited chuibanashumbic abēd icquiduidtsēqui bēdamboen tantiamequin chuipondash.

Acte tëccoasquaid ënëd cac ënëdaid*(Mat. 8.23-27; Duc. 8.22-25)*

³⁵Adashic abi ushëmbi inchëshbudtsëc cano antabëdtoanec Esus: —Chian uquë cuëma utsiuc nuquuidtsëqui nidnu. Nid —quiampondash abëd icquido caic.

³⁶Aden chiac chian cuëman tabadcuededquido niananec badedquido nidquin canon Esus buampondash. Abëd icquidon potenubien cano antabëdtoanquin utsin-utsinquin potepondash. ³⁷Aden potenubien cunquequid dapan acte tëccoasquequin cano acte uemiaidën mentoadtsempondash Esus tëotadec ushnubi. ³⁸Adec uec usho:

—Cunquequid dapan acte tëccoascaidën nuqui mentoeque. Isucunta, icbo —quequin Esus timpondash.

³⁹Aden tinac uëtsëdtoshon Esusën: —Mibi comapenec cunqueque. Ënëd —cac badedquido ënëdpondash. Adembidi: —Mibi comapenec tëccoasqueque. Ënëd —cac badedquido ënëdoapondash acte.

⁴⁰Aden ënëdmetanec Esus: —¿Atotsi quiash ëbi tantienquio yec dacuëdcuedede? Ëbi tantiesa mibi nepec —quepondash abëd icquido caic.

⁴¹Adec Esus cuënubi badedquido cunquequid dapa ënëdposh. Adecbidi acte tëccoasquequid ënëdoaposh. ¿Mitsipadquidën napeba? Ënëd cacpadequi ënëdposh —quec abibi onquecuededequi uëdëquiianquiopondash abëd icquido.

Mayan icsa dadpen dapuduedaid bëdamiaid*(Mat. 8.28-34; Duc. 8.26-39)*

5 ¹Adshumbic acte tëccoasquec ënëdmebon nidquimbi cuëma utsiuc potiash nidaid Cadada cashumbic Quedasa caid yacno choapondash.

²Ambobi choash pudundosho mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash. ³Aidi unësaid chococate cuënote dapa shëcuë uaidën tabadquid icpac caondash. Aidi shocosh bucun mëdantebëdta taë taniaid icboedi nadatiambo yanshobi mëtanetiapimbo yampac caondash. ⁴Abi mëtaniaid shocosh bucu seccuduatanquin tës-tëstenepac caondash. Adosho isac abi tanebocpadquid utsi nibëdpac caondash. ⁵Aidi inchëshën capucuenequi mëyanac bimboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

⁶Aidi abi yacno Esus canon chosho isanec titinquianec choash: —¿Tsusio, ada cho? —quiashic: ⁷—¿Mibëd icquidtabi nedi? Mimi namiaidpenquio nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquio iquembi. Abimbo chiembi quequin ëbi chuita —quepondash mayan icsa dapuduedaid Esus chiec. ⁸Adec mayan icsa dapuduedaid abi onqueshobien Esusën: —Dapuduen —cashic: ⁹—¿Ttsutsi cuëmëdquid mibi ne? —quepondash Esus.

Adoaquien: —Dadpenquioshë. Cuëte podotedi dapuduedondaid nebi —quepondash mayan icsa dapuduedaid abentsëc yac bimboec onquec.

¹⁰Adashic: —Mibi nadatiambocquid cadoque. Ëbitedi chian anëdënquiacno nidmenquiocnuequin ñnëid nidaidën adabi tabadmetsia? —quepondash mayan icsatedi.

¹¹Adnubien macuësh potseshun chanco dadpenshun pec tabadpondash.

¹²Aden pec tabadsho isashien: —¿Ada mimbi ëbitedi chanco dapuduedmetsia? —quepondash mayan icsa Esus caic.

¹³Adoaquien: —Dada dapduencuededash chanco dapuduedcuededta —Esusën cac dapduencuededash acte dapa quiusudacnombo comapenec niquec pudun-pudunec mentoadbudnepondash chanco nibëdquieç.

¹⁴Adsho isash chanco pemequin isquido chieç nidanepondash. Adec nidquimbi shubu dadpen icquid uano-uanoc tabadquido chuituidac aidotsen isec cho-chopondash. ¹⁵Esus yacno cho-choshon mayan icsa dapuduedaid bëdamiosh quequin chuituidac mayan icsa dapuduedaid icboed naden isbededpondash. Dashcute dasiuidesa icboedi dasiuidash tsadsho abimbo iquec quequin isbededpondash. Aidën tantienquicboedi tantieç tsadsho adembidi isbededoapondash. Adec tsadsho comapenen isbededequi nadatiambocquin naid nepec quetsëcquieç tabadcuuededpondash. ¹⁶Adec tabadsho isun mayan icsa dapuduedaid bëdamequin chanco dapuduedmesho isboedon cho-choquido tantiamenuen chuibampondash. ¹⁷Aden chuisho tantiasun cho-choboedon: —Nëmbo tabadenquio yec nidec nid. Mibëd tabadtiapimbo iquebique —capondash comapenen Esus chushcaquin.

¹⁸Adsho tantiasun cano yacno nidequi cano Esus antabëdtonobien mayan icsa dadpen dapduemboed choash: —Mibëd icte bunebi. ¿Adabi buane? —quepondash. ¹⁹Adoaquien: —Padi. Min shubuno nidtan. Ambo nidshun mibi bëdamequin mayan icsa dadpen dapduemeboed Nuquin Papa tantiaquin chuiban. Nuquin Papan ëbi

ad icsho unësquiocquin dapduemiach quequin chuiban —quepondash Esus.

²⁰Aden Esusën chiaquien nidpondash. Nidequi shubu dadpen icquid yacno-yacnomboec nidanec nidaid Decapodis caid yacno choshon Esusën naid chuiban-chuibampondash. Aden chuiban-chuibansho tantiaquidtedi, Adopenshenda Esusën bëdamiasun, quec abibi onquec tabadcuuededpondash.

Nua intac budaid bëdameshun champi unësaid bëdamiaid

(Mat. 9.18-26; Duc. 8.40-56)

²¹Adshumbic canon Esusbëd icquidon padpiden abi chobocmibidi chian poteoapondash. Adec chosho isash matses dadpen chian cuëmmano padpidec cho-choashun mananuc Esus pudundotsëcshobi badedquio tsucus-tsucustsëcquio yec datsidadpondash. ²²Adnubien Nuquin Papan chiaid chuibante shubun tabadquido isquid, Aido cuëmëdquid, chopondash. Adec choquimbi Esus istuidash mibi bëdambocquid nec quequin ismenuec Esus tauebudshun: ²³—Con champi unëseque. Aid mishquin bëdamec cho —cac ²⁴Aidobëdi Esus nidpondash.

Adec nidshobi matses dadpenshun tsibanampondash. Tsucus-tsucustsëcquio yec nidquin Esus tsibanampondash.

²⁵Esus tsibanquidquido chido utsi icpondash. Aid chido seta 12ted matamec intac budash bëdanenquiocquid icpac caondash.

²⁶Dauë meniaqui bëdanenquio icpac caondash. Dauëchoquid utsi-utsien piucquid menequin dauë bedshun chequi bëdanenquio yec intac nuambo yampac caondash aton piucquid naimëdnubi. ²⁷Adec intac icnubi capuquin Esusën nabanaid chuisho tantianec nidquimbi matses dadpenshun

tsibananubi aidëtsen tsibanampondash. Aden matses dadpenshun tsibananubi ismenquiocquin cachoc choshon Esusën dashcute mishpac caondash. ²⁸Aden aton dashcuteuidtsëqui mishec bédampatsiash icmane qeshun mishtsequi bédampac caondash. ²⁹Intac bédanenquiocquid Esus mishec bédampac caondash. Ĕmbi tantiapadquiequi bédanobi quequin amibi tantiapondash.

³⁰Adec chido bédanubien Ĕmbi nadatiambocquin naoc quequin tantiec amibidi bidiadquin isec Esus: —ĔTsuntsimbini mishposh? —quepondash.

³¹Aden chuisho tantiashun abëd icquidënguio: —Tsucus-tsucustsëcquio matses dadpen iquec, ĩtsuntsimbini mishosh, quecta ique? —capondash.

³²Adec abëd icquid cuëdnubi onquenquiocquin, ĩMidaquidënguio mishoshibique? Isnu, abibi quequin matses utsi-utsien bëispondash Esusën.

³³Aden bëisbanubi, Ĕmbi mishoc quenquio yec bédamboed uëdëquec choequi mibi nadatiambocquin naquid nec quequin tantiequi Esusën taëno uebudshun abi mishec bédanaid chuibampondash. ³⁴Adoquien Esusën: —Champi, mimbi tantiapadquiequi mibi bédanoc. Dada icsambo icboedi nëbi dada bédambo mibi iqueque. Bédambo yec nid —capondash chido chuiquin.

³⁵Aden nidmenubien Aidon shubun icquid cho-choshon: —Min champi unësoshe. Tsusio chomenda —capondash Aido chuiquin.

³⁶Adnubien Aido Nuquin Papan chiaid chuibante shubun tabadquido isquid caic: —Dacuëdenquiocquin ĩbi tantiata —quepondash Esus.

³⁷Aden Aido chuishun Esusën: —Cho-choenda —capondash abi

tsibanuequido chuiquin. Aden chianec Petedobëdta Acobo Uan, Acobon utsimbo aidtedi buanec Esus nidpondash. ³⁸Adec nidequi Aidon shubuno choquin comapenec shubicuededsho tantiatuidpondash. ³⁹Aden tantiequi puduedash Esus: —ĔAtotsi quec comapenec shubicuedede? Champi unësenquio yec ushac bimboec uec nec —quepondash.

⁴⁰Adshobien tantiesa icquin mamëshumbededpondash. Adoquien aidtedi puduemiasch champin tita aton papa chedo abëd icquidbëd champi yacno Esus puduedpondash. ⁴¹Ambo choshon mëdante mëdintanquin Esusën: —Talita, cumi —capondash. Aton onqueten, Champi, isucunash nidto, quequin adopondash. ⁴²Adoac badedquio isucunash nidtoash capupondash. Champi seta 12ted icquid niondash. Aidi bédansho isun abitedishun, Adopenshenda iquec quequin isbededpondash. ⁴³Aden champi bédameshun Esusën: —Ĕmbi naboe utsi chienda. Abimbo caimbi. Abentsëcquibochienda —capondash. Aden chuitanequi: —Champi peme —quepondash Esus.

Abi icnëdacnoshon Esus chieshënguio (Mat. 13.53-58)

6 ¹Auëshquio puduanec nidequi abi icnëdacno Nasaded caid yacno Esus choapondash. Abëdi abëd icquido chopondash. ²Ambo tabadashic chonoadtemaid ushën Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusën. Aden chuibansho tantienquiocquid abentsëc: —ĔMitsishun chuibansho tantiashun adomboen Esusën chuibampec? —quepondash.

Adnubien utsi: —ĔMitsicquidën ismiac Esusën nadatiambocquin nabampec? —queoapondash.

³Adnubien utsi: —Nëmbocquid, cuëte nacnenquid, Osen mado nec —queoapondash.

Adnubien utsi: —Ani Madia nec. Aton utsibo nëidtedi nëmbo tabadquid nec. Nëidic Acobo, utsibic Ose, utsibic Udas, utsibic Simon. Nëmbobidi aton chibi chedo tabadoaic —quetsëcquiec tabadec onquecuededec chieshcuededpondash.

⁴Aden chieshënaqui Esus nadpondash: —Utsi yacno nidshun Nuquin Papan chiaid chuibansho tantiaquid dadpen icnubi abi yacno chuibansho chieshënquid aton matses iquendac. Aton shubun icquido adecbidi iquendac —quepondash Nasaded yacnocquido chiec. ⁵Aido abi chieshënquid icsho isun nadatiambocquin nabantiapimbo icpondash. Èbi bédamepec quequin tantiaquidquio daëdpactsëc icsho mishquin bédamepondash. ⁶¿Atotsi quiaish èmbi chiaid tantiatipimbo icpec? Adembidi nadatiambocquin nasho istiapimbo icpec quepondash Esus abibi onquec.

Abëd icquido Esusën nidmiaid

(Mat. 10.5-42; Duc. 9.1-6)

Adashic auëshquiobi puduanec nidaniash shubu daëdpactsëc yacno puduedcuenequin Nuquin Papan chiaid Esusën chuibenepondash. ⁷Adec cuenadquin chuibanequi abëd icquido caic: —Cho —quetanec tabadtuidpondash. Adec tabadtuidash Esus: —Nëbi mibi daëdshun-daëdshunquien chuibanec nid. Chuibanquimbi mayan icsa dapuduedaid dapuduemeta. ⁸Nidquin dadpen mitsana sauédshun buanenda. ⁹Tapucudte sandadia caiduidtsëqui tapucudash nidaneta. Adecbidi utsi bedenquio yec mibi dasiuidaiduidtsëqui dasiuidec nidaneta. ¹⁰Shubu dadpen yacno nidash mibi yuedaid shubun

puduedash ambouidi tabadquin chuibanta. Auëshquio puduanec nidequi shubu dadpen yacnobidi nidshun adquiecbidi tabadquin chuibanoata. Adenuidi naquin chuibanta. ¹¹Mibi yuedquid nibëdsho isash nidaneta. Auëshquio nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomboen ismeta —capondash Esusën abëd icquido chuiquin.

¹²Aden Esusën chiaquien nidanepondash. Adec nidshumbic, mibi icsaid ënshun padpiden tantianu quenquiocquin Nuquin Papan chiacpadomboen nabanta quequin chuibampondash Esusën nidmiaidon. ¹³Adembidi mayan icsa dapuduedaid dadpen dapuduemepondash aidëmbidi. Adembidi nënquid dadpen daicsaid chedo cuëte bacuë bëchichoquid ënë dachinquin bédameoapondash Esusën nidmiaidon.

Uan acten mentoanquid mapi butiaid

(Mat. 14.1-12; Duc. 9.7-9)

¹⁴Adnubien, Chuibanquimbi Esusën nadatiambocquin nabanosh, quequin isboedon ancanquid Edodes chuipondash. Aden chuiban-chuibanac dadpenshun Esusën nabanaid tantiapondash. Aden tantiash: —Uan acten mentoanondaid mapi butemeboed uincuempash icnui. Adec uincuenshun nadatiambocquin nabanec nepanui —quecuededpondash tantiaquido.

¹⁵Adnubien utsibo: —Ediasien nechitec. Nuquin Papan chiampicpadquiec choashien nec —quecuededpondash.

Adnubien utsibo: —Nuquin Papan chiaid chuiampidien Esus yanchitash —quecuededpondash.

¹⁶Adnubien Edodes: —Ëmbi mapi butemiondaid, Uan pado, uincuempash icnui —quepac caondash.

¹⁷Ënden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caid, bedacsho isash: ¹⁸—Min utsin chido mimbi bedaid natemaïd niosh —qeshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuisho dadpenshun tantianushe qeshun Uan bedmeshun quënën nauedmepac caondash Edodesën.

¹⁹Adoaquien Uan Edodiasën chieshënuin: —Uan cuesunemetiadquidi mibi nec —quepac caondash aton bënë Edodes caic. ²⁰Uan bédambocquid Nuquin Papan chomiaïdbidi nec qeshun Edodesën Uan cuesunemetiapimbo iquec cudaspac caondash con chidon cuesunemenushe quïash. Aden tantiaquin Edodesën abi tsadacno Uan chuibamenuen chomedenepac caondash. Uanën chuibansho tantiash: ¿Atotsimbi nëïd napeba? Ambi chuibanaïd bédambo iquec. Aidën chuisho tantiash bédambo iquebi, abibi qeshumbic Edodesën chomedednepac caondash chuisho tantianuen.

²¹Adnubien aton chido bunacpadomboen Uan cuesunemete ushë chonobi naden napac caondash: Aton bënë abi tishte ushë tantiaquin abipadquid dadpen pemenuen chomepac caondash. Ademibidi sondado tusio dadpembidi chomeoapac caondash Edodesën. Cadidia yacnocquido chuiquid dapabobidi chomeoapac caondash. ²²Aden aidtedi cho-chomiash tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bédamboen

mimbi naoc —quecuededpac caondash Edodesën chomiaïdo champi caic.

Adec onquesho tantiashien Edodes aton chidon champi caic: —Mibi bunaid mibi menenu. Ëbi chui. ²³Abimbo caimbi. Mibi bunaid ëbi chuita. Mitsanatedi bunebi ëbi casho tantiashun dadpen mibi menembi —quepondash.

²⁴Aden Edodesën chuisho tantiash: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Ëbi chui,” Edodesën caoshi. ¿Atotsimbi chuipe, tita? —quepac caondash ani chiec.

Adsho tantiashun anin: —Uanën mapi bunebi quequin chuita —capac caondash aton champi chuiquin.

²⁵Aden chiaquien badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon ëbi mene —capac caondash anin chuibocpadomboen chuituidquin.

²⁶Adsho tantiash Uan tantiec unësquio icpac caondash Edodes. Adec unësquiocquin ambi champi chiacpadomboen natiapimbo iquec ëmbi chomiaïdo quenushe qeshun adoembi abibi qeshun: ²⁷—Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin ²⁸maspanën nandoshon bëshun champi meniac bedshun champin aton tita menetuidpac caondash. ²⁹Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chococapac caondash.

Dada 5000ted Esusën pemiaïd
(Mat. 14.13-21; Duc. 9.10-17; Uan 6.1-14)

³⁰Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi

chuibamboed chuibampondash. ³¹Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquio iccuededpondash Esusbëd icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

³²Aden chiashic cano antabëdtoanec matses nibëdacno nidpondash aidtedtsëqui. ³³Adec nidsho isash matses dadpen abi nidte yacno tantiec: —U nidanec —quiash titinque choec abia cho-chopondash. Abia titinquequid cuensho isash utsi-utsiec dadpen titinquec cho-choapondash. ³⁴Adec aidtedi abia cho-choambien Esusbëd icquido choapondash. Pudundoquimbi matses dadpenshun abi cainec tabadsho isashien Esus, Abi tantiamequin Nuquin Papan chiaid chuiquid nibëdacbimboecnuc matses cho-choec quequin tantiec unësquo iquebi qeshun tauain chuibampondash Esusën. Yuen chuibampondash.

³⁵Yuen Esusën chuibanubi ushë budpondash. Ushë budsho isun abëd icquidon: —Icbo, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. ³⁶Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

³⁷Adoaquien Esusën: —Mimbibi nëidtedi pemeban —capondash. Adsho tantiashien: —¿Adambi nidshun piucquid menequin panëmpi bedpe? Ma matses dadpenquio yoc —quepondash abëd icquido Esus caic.

³⁸Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi

sincoted icnubi nuëcquid dosted iquec —quepondash.

³⁹Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. ⁴⁰Adoac ambi chiacted-tedquiec tabadbudpondash. ⁴¹Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbi nadatiambocquin naid ismembi —qeshun cuësh-cuëshun: —Meneban —Esusën cac abëd icquidon menebampondash. ⁴²Menebanac piash: —Padi. Piombi —quecuededpondash pequido. ⁴³Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. ⁴⁴Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenquiocquin dadatedictsëqui tambampondash 5000ted iquec quequin.

Acte bëntse Esus choaid

(Mat. 14.22-27, 34-36; Uan 6.16-21)

⁴⁵Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedi nidmembi —quepondash Esus abëd icquido caic. ⁴⁶Adoac canon potenubi matsestedi nidmianec matses nibëdacno macuësh yacno Nuquin Papa chuinuec Esus nidpondash. ⁴⁷Adnubien inçhëshbudtsëqui abëd icquido acte nënantanquio canon noadpondash. Ambobi noadnubi Esus abentsëqui mananuc tsadpondash. ⁴⁸Ashunquio Esusën isaquien abëd icquido bëdiactsëcquio nidquimbi comapenen cano uncapondash cunquequid dapan bëdëd-bëdëdnubi. Adnubien cachina

cuëdanabi badiadtiapimbocnoc acte bëntse choquin abëd icquido Esusën ismetuidpondash. ⁴⁹Datantsensho isash, Mayambien nechitec, quequin ambibi tantiec sidquecuededec ⁵⁰dacuëdcuededpondash.

Adsho isumbien: —Ëbibí nebíque. Dacuëdenquo yec tabadta —capondash Esusën. ⁵¹Aden chuitanec cano antsadtonobi comapenec cunqueboedi ënëdpondash. Aid ënëdsho isash: —Adquidshenda nepec —quepondash abëd icquido. ⁵²Panëmpi daëdpactsëc ictsëcquid matses dadpen menebamboedën naid nec quequin tantienquicpondash. Adembidi Esus acte bëntse capusho isun, Nadatiamboquin naquidën naidbidi nec, quequin tantienquo icoapondash pamunacbimboecquin.

⁵³Ashunquo chian potiashic nidaid Quenesaded caid yacno choshon cano nëshpondash. ⁵⁴Aden nëshash mananuc pudundoshó isec anocquido, Aidi bëdamianquid nec, quequin ambibi tantiaquimbi ⁵⁵daicsaid aton ueten nandoshon Esus yacno bë-bëpondash. ⁵⁶Adecbidi shubu dadpen yacno-yacnomboec Esus puduedcuenesho isun adembidi anocquidon, Bëdamequid nec, queshun daicsaido bë-bëpondash. Adoac —Min dashcute ëbi mishme —capondash bë-bëaidon. Aden ambi tantiacpaden Esusën dashcute mishash bédancuededpondash.

Nuquin Papan paucaid

(Mat. 15.1-20)

7 ¹Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon, ²Ëmbi mishboed mishtemaid ictsíash, quesa iquec tsusedpabon chuinëdacpadquiec

mëpanudabi Esusbëd icquidon pesho ispondash. ³Padiseyobo isadaidbobidi yec tsusedpabon chuinëdacpadquiec penush mëpanudanequid nec. ⁴Tiedën caniquid ambi piucquid menequin bedacnoësh choec adecbidi penush tsusedpabon chuinëdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaíd utsi-utsiec dadpen iquec. Ambi chuinëdacpadomboen dëshotetsen cachonouidi dapanquidquibidi nec. Adembidi matsu nacnenaid cachonouidi dapanoaquidquibidi nec. Shocosh matsu cachonouidi dapanoaquidquibidi neoaic. Tsusedpabon chuinëdacpadomboen naquidquo nec.

⁵Aden nabanquidquo padiseyobo nec. Adquibidi abipadquid utsibo isadaidbo tsusedpabon naden nata quequin chuinëdaíd tantiaquid neoaic. Adec tsusedpabon chuinëdacpadquiec Esusbëd icquido mëpanudenquiocsho isash padiseyobo: —Atotsieshun mibëd icquidon tsusedpabon chuinëdacpadomboen nainquicquin mëpanudabi pepec —quepondash Esus caic.

⁶Adoquien Esus: —Isayasën ëndenquo dada uaquin mibitedi bëdamboen chiampidpadquid mibi nec. Ambi dada uampid nad iqueque. Tántia:

“Nuquin Papa bëdambocquid nec quequin chiacpadomboen tantiesá isadaidbo nec.

⁷Abia Yampidënquo Nuquin Papan nadomboen nata quequin chiaid tantiesá icquin tsusedpabon nadomboen nata quequin chuinëdaíd tantiaquidquo nec.”

⁸Aden tsusedpabon chuinëdacpadomboen nabanquin Abia Yampidënquo chiaid niacquid mibi nec

—quepondash Esus isadaidbo tsusiobo caic Nuquin Papan Isayas dada uamepampid tantiamenuec.

⁹Aden chuishumbic adomboembidi chuioaic: —Badedquo Nuquin Papan chiaid chieshënquin tsusedpabon nadomboen nata quequin chuinëdacpadomboen nabanquidquo mibi nec. ¿Aden naquinda Nuquin Papan chiacpadomboen mimbi nape? ¹⁰Nuquin Papan chiacpadomboen Moisesën dada uampid nad iquec: “Titan papabëdtan chiaid chieshenquiocquin naban.” Adquidën chiaid utsi nad iqueque. Tanta: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec. ¹¹Mibien tsusedpabon chuinëdaid tantiaquin adoesa nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuioaic. Aden chuiquin papabëdta tita tantiaquin nashunenquiocquin Nuquin Papan chiaid niacquid mibi nec. ¹²Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoaic utsibo. Adecbidi, Tita, mibi nashunquin menetiapimbo iquebi, queoaic. ¹³Aden chuiquimbi titabëdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinëdacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinëdaid nata quequin mimbi chiec —quepondash Esus isadaidbo tsusiobo caic.

¹⁴Aden Nuquin Papan chiacpadomboen niacquido chiasheic: —Utsibo, tantiec cho. Mibi bëdamboen chuinu. Bëdamboec papuduedta.

¹⁵Tsusedpabon chuinëdacpadquiec mëpanudabi mimbi piaid min tantiate icsabudtemaid nendac. Icsamboen tantiec mibi icsaic. ¹⁶Ëmbi chiaid tantiaquin utsi chuibanta —quepondash Esus.

¹⁷Aden chiasheic iccuededquido abi tabadnubi shubun puduedash tabadpondash Esus. Tabadsho isash: —Mimbi chuiboed ëbitedi tantiamen —quepondash abëd icquido.

¹⁸Adoquien: —Utsitedishun tantienquo icbocpadquido mibitedi neque. Tanta. Mimbi piaidën mimbi tantiaid icsabudtiapimbo iquec. ¹⁹¿Min tantiate yacnoda mimbi piaid nidpec? Padenquo. Mimbi piaid min pucu yacno bud-budec auëshquo chimu nëncuenash puduenec —quepondash abëd icquido caic.

²⁰Aden chiec onquiashic: —Mimbi tantiacpadquiequi mibi icsabudec.

²¹Chido mimbi inacmaid isash chudtiadquo iquec quequin mimbi tantiacpadomboen chido isuidtiapimbocquin mimbi chudted-chudtedec. Utsin na bedtiadquo iquebi quequin mimbi tantiacpadomboen mimbi ampec. Cuesunetiadquo iquebi quequin mimbi tantiacpadomboen mimbi cuesunepec. Utsin chido chudtiadquo iquec quequin mimbi tantiacpadomboen aidi mimbi chudpec. Dada utsin ëbi bëdaidquicsho ispec quequin mimbi tantiacpadomboen min bënëpenquo chudmequid mibi nec. ²²Utsin bedacted bednu quequin mimbi tantiacpadomboen bedquid mibi nendac. Adecbidi utsin bedaid isash adomboembidi bednu queshun isuidesa iquec adomboen bedbanquidquo mibi

yampec. Mibibi icsambocquid nec
quiash chieshëmëñquid mibi nendac.
Adquid abimbo chiacimboen chuiquid
mibi nendac. Icsauidi bunquin adenuidi
nabanec. Mibi icsaquin
ompoenquiocquin nabanquid mibi
yanec. Utsi bëdambo icsho isash
chieshënquid mibi icpec. Utsi
icsamboen chuiquid mibi nendac. Utsin
chuisho, Èbentsëqui tantiaquidquo
nebi, quequin mamëñshunquid mibi
nendac. Ademibidi nasho
mamëñshunoaquidbidi mibi nendac.
Ëmbia tantiaquid nebi, quequin
mimbibi nabanaid icsa isash bëdambo
iquec quec mibi mamëñec tsadec.
²³Ëmbi chuiboedtedi icsaquidën naid
nec. Aden tantiaquid icsabudte nec
—quepondash Esus.

**Sidopenisia caid yacnoësh chido ambi
tantiacpadquiec bëdanaid**
(Mat. 15.21-28)

²⁴Aden chiashic isadaidbo yacnoësh
puduanec nidequi isadaidpembo yacno
nidpondash. Shubu dadpen icquid Tido
caid anoentsëqui yacno choash shubun
puduedash: —Nëmbo ëbi choaid
chienda —quepondash Esus. Ambi
chiacpadpenquiocnoc chuisho
tantiapondash anocquidon. ²⁵Adoac:
—Esus chosh —quesho tantiashien
mayan icsa dapuduedaidën tita Esus
tabadacno nidpondash. Adec nidec
puduedequi Esus tauebudpondash
chuiquid dapa nec quequin tantiec.
²⁶Isadaidpembon chido nidaid
Sidopenisia caid yacnocquid niondash.
Aidi Esus tauebudash: —Con champi
mayan icsa dapuduedaid dapudueme,
tsusio, —quepondash comapenen chiec.
²⁷Adoquien Esus: —Mabi con matses
isadaidboba bëdamenuiec choboc.
¿Bacuëbo cubudabicnubi opashëmpida
pete menequin anin bënëpadic?

Padenquio. Ademibidi, ¿isadaidbotedi
bëdamiabidambi matses utsibo,
isadaidpembo, bëdamepadi?
—quepondash Esus.

²⁸Adsho tantiashien chido: —Icbo,
mimbi bëdamboen chiec. Padnuen anin
meniac bacuëbon pete sananaid
cuëshëmpi paëdtsacsho opashëmpin
ambibi bedshun pec. Ademibidi mimbi
nadatiambocquin nabanac isadaidbo
dadpen bëdanubi isadaidpembo
abentsëc tantiaquid yec bëdanoapec
—quepondash chido.

²⁹Aden chidon chuishobien:
—Bëdamboen mimbi chiec. Aden
tantiaquid mibi neque. Nidec nid
shubuno. Mayan icsa dapuduedaid
dapuduenaque. Isec nid —capondash
Esusën isadaidpembon chido chuiquin.

³⁰Adsho tantianec choec shubun
puduedquin isaquien aton champi
uebocno ënden mayan icsa niqian
bëdanash abi ushaidëmbi uec.

**Pashu buëd onquenquiocquid
Esusën bëdamiad**

³¹Adashien Tido caid anoentsëcuësh
nidequi Sidon caid matambidanec chian
Cadidia caid yacno choapondash Esus.
Nidaid Decapodis caid shubu dadpen
yacno-yacnomboec capucueniash
choapondash. ³²Ambo choash
tsadnubien dada icsa, pashu buëd
onquenquiocquid, Esus yacno bëash
tsadquin: —Nëid mishquin bëdame
—capondash.

³³Adsho tantiashun iccuededquido
ismenquiocnuen udictsëc dada icsa
buanshun aton mëdante bushbi pashun
pabiate pausuntanquin chicpondash
Esusën. Adshun, min anatsen mishnu
quetanquin ismequin uicchun
mëpidadtanquin pashun ana
mishpondash. ³⁴Aden amishec abuc
isec: —Epata —quepondash. Paucud,

quec adpondash Esus. ³⁵Adec Esus cuëdnubi pashu buëd onquenquicoboedi tantiadcuenash onquiampondash.

³⁶Aden pashuaid bëdamiash: —Esusën naid nec quequin chienda —quepondash Esus. Adoboqui niacbidanquin chuibampondash. ³⁷Aden chuisho tantiash: —Adquidshenda Esus nepec. Ambi naidtedi bëdambo iquec. Pashu paucquid nec. Adembidi ana onquesa oncamequid nec —quec onquecuededpondash.

4000ted matses Esusën pemiaid

(Mat. 15.32-39)

8 ¹Adashic Esus yacno matses dadpen padpidec cho-choash yuec tabadec bundocuededpondash. Adsho isun abëd icquido chomiaish Esus nadpondash:

²—Matses bunec tabadsho isash unësquo iquebi. Daëdec ushec ëbëd tabadquin aton pete uesquin piac. ³Aton pete nibëdsho isash, Pec nid, quetiapiombo iquebi padishnushe quiaish. Ënapenuësh dadpen cho-choash nec —quepondash Esus abëd icquido chiec.

⁴Adoquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? —quepondash abëd icquido.

⁵Adsho tantiashien: —¿Tedtsi panëmpi mitsana iquec? —quepondash Esus.

Adoquien: —Siete iquec —quepondash abëd icquido.

⁶Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nëid meneban —cac abëd icquidon iccuededquido menebampondash. ⁷Adembidi nuëcquid dëmishaid daëdpactsëcbidi bedshun: —Mimbi meniaid nec quequin tantiembi, Papa —qeshun: —Nëidtsen

meneban —Esusën cac menebanoapondash. ⁸Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abëd icquidon bedaid tsitsan sieteted icpondash. ⁹Peboedo dada caniaid dadpen 4000ted icpondash. Chidon aton bacuëbobëdtambi pepondash. ¹⁰Aden pemeshun peboedotedi nidmiaish Esus abëd icquidobëd cano antabëdtoanec nidquin Dadmanuta caid yacno potepondash.

Nadatiambocquin nata. Isnu,

padiseyobo quiaid

(Mat. 16.1-4; Duc. 12.54-56)

¹¹Aden potiaish tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

¹²Adsho tantiash, Èbi tantiesha nec, quec unësquo yec tsadequi —Èmbi naid dadpen mimbi ispaboc. ¿Adosho isboshida, Èbi isme, queoape? Nadatiambocquin nabanquin èbi isme caqui ismenquo iquembi. Abimbo caimbi —quepondash Esus. ¹³Aden chianec nidec cano antabëdtoanquin uquë cuëma utsiuc poteoapondash.

Nuquin Papan chiaidbëdta ambi chiaid

daëd uaqin chuiquid padiseyobo

(Mat. 16.5-12)

¹⁴Badedquo Esus nidnuesho tantiash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc. ¹⁵Aden potequimbi Esusën nadopondash: —Pan uanuequidën trico caid putubëdta bidiscamete acte pistsëc cacushaqui nua yec bidisquëc. Adembidi padiseyobon Nuquin Papan

chiaidbëdtabi ambibi tantiaquin chiaid
daëd uaquin chuibanec. Aden
chuiquidbidi Edodesbëd icquido nec
quequin tantiata. Aden tantiaquin
padiseyobopadquid adecbidi
Edodesbopadquid icmane queshun ambi
tantiacpadomboen nabanenda
—capondash Esusën abëd icquido
chuiquin.

¹⁶Adsho Esusën chuibod icsamboen
tantic abëd icquido: —¿Ëmbi panëmpi
bëambo yaidta icbon chuipec? —quec
onquecuededpondash.

¹⁷Aden chiec onquecuedednubien
tantiaquidquo icquin Esusën
nadopondash: —¿Atotsi quiash ¿ada
panëmpi bëambo yaid con Icbon
chuipec? quepe, mibi? ¿Ëmbi
nabamboed isenquio yec bëshu
tsadac bimboecta tsadpo? ¹⁸Adecbidi
¿Ëmbi chuibanaid tantienquio yec
pashuac bimboecta tsadoapo?

¹⁹¿Panëmpi 5ted bedshun
cuësh-cuëshun menebanaqui napi uaid
tsitsanën sandoaid tedtsi iccoshe? Chui
—capondash Esusën.

Adoaquien: —Dosedet iccosh
—quepondash abëd icquido.

²⁰Adoaquien: —Adembidi, ¿nëbi siete
panëmpi bedshun matsesën piaid napi
uaid tedtsi tsitsanën sandoaid icposh?
Chui —caoapondash Esusën.

Adoaquien: —Siete iccosh
—quepondash abëd icquido.

²¹Adoaquien Esus:
—¿Nadatiambocquid Esus nec quequin
ëbi tantienquioda mimbi icpe?
—quepondash abëd icquido caic.

Betsaida caid yacnoshon bëshu bëdamaiaid

²²Adshumbic Betsaida caid yacno
poteoapondash Esusbëdtambidi. Aden
potiash chosho isun bëshuaid
bëpondash anocquidon. Aden bëshun
ismequin: —Nëid bëshumbo neque.

Mibi bëdamianquidquo icquin
mishquin bëdame —capondash Esus
chuiquin. ²³Adsho Esusën bëshu
mëdinanquin Betsaida caid anoentsëqui
buanshun uicchun bëcuishtuatanquin
bëmishec: —¿Ada mimbi iseqe? Ëbi
chui —capondash Esusën.

²⁴Adsho tantiash Esus isquin:
—Bëdamboen isenquiocquin cuëte podo
inchëshquio yac bimboecnuc mibi isembi
—capondash bëshuaidën. ²⁵Aden
chuishobi Esusën bëshuaid padpiden
bëmishoaquien bëucudquiopondash
bëdamboen isec. ²⁶Aden bëdamboen iso
isun: —Nëbi min shubuno nid. Shubu
dadpen icquid Betsaida caid
datambidanec nid —quequin Esusën
nidmepondash.

Quidistu mibimbo neyoc, Petedo quiaid
(*Mat. 16.13-20; Duc. 9.18-21*)

²⁷Aden nidmiashic ancanquid Uedipo
caid tabadaid nidaid Sesadeya caid yacno
nidequi: —¿Atotsi Matsesën ëbi capec?
—quepondash Esus abëd icquido chiec.

²⁸Adoaquien: —Utsi-utsiec, Acten
mentoamboed, Uan Esus nec, quenubic;
utsi-utsiec, Edias, Nuquin Papan
chiacpadomboen chomiaidien Esus
nechitec, quenubic; utsi-utsiec, Nuquin
Papan chiaid ëndenquimbo
chiampidpadquidien Esus nechitec, quec
—quepondash abëd icquido Esus caic.

²⁹Adsho tantiashun: —Ma
mibitedishun ¿atotsibi cai? —capondash
Esusën.

Adoaquien: —Quidistu, Nuquin Papan
ambi tantiampicpaden abi yacnoshon
chomiaidquo mibi neyoc —quepondash
Petedo abëd icquid utsibo
onquiac bimboen chuioaic.

³⁰Adsho: —Mimbi chuibod utsi
chienda. Abentsëcquiobi chienda
—capondash Esusën abëd icquido
comapenen chuiquin.

Abi unës uate Esusën chiaid*(Mat. 16.21-28; Duc. 9.22-27)*

³¹Aden chuishun abi unës uate tantiamequin abëd icquido Esusën chuipondash. Nuquin Papan chomiaid yec matsesacsho isadaidbo tsusiobon chieshënquin ëbi mëyanendac. Aden mëyanquin unës uaqui daëdec ushash uincuenoaindabi, quequin Esusën chuipondash. ³²Abi unës uatequid chuipecshenda niondash. Aden Esusën chiaquien aidbëdtsëqui uano nidshun Petedon: —Aden tantiaquin chienda —capac caondash.

³³Aden Petedon chuisho tantiasch aucebidi bidiadquin abëd icquid utsibo isec Esus nadpondash: —Nidec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimi tantiec —quepondash Esus Petedo comapenen chushcaic. Petedo Satanasbimboecquid nec quequin Satanas capondash Esusën Petedo chuiquin.

³⁴Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu queshun mibi bunaid nainquiocquin ëmbi chiaid tantiaquin nabanta. Ëbi mëyanacpadembidi mibi mëyante icnuc niaquenda. ³⁵Esus tantiaquin ambi chiacpadomboen nanu queboedi unësmane quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmane quenquiocquin ëbi chuibanec tabadquid Nuquin Papa yacno tabadendac. ³⁶Aden aton na dadpen bedbanashic Esus tantiesha yec unësash Nuquin Papa yacno puduedtiapimbo iquendac. ¿Adquidta

bëdambo icpadic? ³⁷¿Nuquin Papa mitsana menecta abi yacno puduedpatsia? Padenquio. ³⁸Utsi icnubi dacuëdec Esus tantiaquid nebi quesa chido aton bënë bunenquio yec dada utsibëd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesha caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan ëbi icmiac ëmbi abucshun uaido mayan bëdabobëdi nidaidën choaindabi. Adece aidobëdi choashun ëbi chieshënquid isec, Con utsi nec, queoatiapimbo iquendabi —quepondash Esus cho-choquido caic.

9 ¹Aden chiashic Esus: —Nëbimbobi tabadquid ëbi tantiaquid utsi-utsiec unësabicquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

Esus bëdaidquio icmiaid*(Mat. 17.1-13; Duc. 9.28-36)*

²Aden chuibanashic 5ted ushash: —Nidnu. Nid —quianec Esusbëd Petedo, Acobo, Uan, aitedi ambi chiactedi macuësh dapa yacno nidpondash. Ambo nidash tabadquimbi abi bëdambo isadaid aidon ispac caondash. ³Abi dasiuidaid dashcute icboedi nac-nacquio yampac caondash. ⁴Edias, Moises, aid daëd ënden yampidi Esusbëd onquesho ispac caondash Esusbëd choboedon. ⁵Aden isequi: —Chuiquid Dapa, nuquibi nëmbo choash tabadquin mibi isec bëdambo iquebi. Min shubumpi 3ted icnuc shubu uanuna mitsana, Moisesën na, Ediasën na, aitedic icnuc —quepac caondash Petedo. ⁶¿Atotsimbi chuipe? quetiapimbo yec dacuëdcuedquid aden chuipac caondash Petedon.

⁷Adec tabadshobien abu ushu choquidën ambo tabadquidtedi bêtimpac caondash. Aden bêtinacnoëshquiobi Esus chiec onquiampac caondash: —Esus, con madombo con dayunquiocquid nec. Adquid icquin chuibansho bëdamboen tantiata —capac caondash Nuquin Papan.

⁸Adsho isbanquin isaquien Esusbëd choboeduidi icoapac caondash.

⁹Adanec macuësh yacnoësh budtanequi: —Mimbi isboed nëbi chienda. Ēbi Nuquin Papan mado mattsacsho unësmiac ěbi uincuenan mimbi isboed chuita —capac caondash Esusën. ¹⁰Adsho tantiash utsi chienquio yec abi uincumete ěmitsipadquio icpec? quec abibi onquecuededpac caondash Esusbëd chobedo.

¹¹Adec onquecuededash: —Nuquin Papan chomiaidquio choabincuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ěndenquimboshë chopampic —quepondash abëd icquido Esus caic.

¹²Adoaquien: —Ai, Ediasën mattses bëdamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomiaidquio yec mattsesash nëbi tabadsho mattsesën chieshënnquin mëyanendac quequin chuiampid nec. ¹³Ediasën chiampicpadquie Uan acten mentoanquid chopondash. Aidi choacsho abi bunacpadomboen abi chieshënnquidën mëyanac. Ěndenquimboshë Edias chiec onquequin dada uampicpadomboen Ediaspadquid chomiaid Uan choshon, Mibi icsaid ěnta, quequin chuisho abi chieshënnquidën mëyanondash —quepondash Esus abëd icquido chiec.

**Mayan icsan buëd onquetiapimbo
icmiaid Esusën bëdamiaid
(Mat. 17.14-21; Duc. 9.37-43)**

¹⁴Adec onquetanec choquin isquien mattses dadpeshun abëd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bêtimpondash.

¹⁵Adnubien Esus chosho isash iccuededquido, Bëdamaianquid choec. ěAtotsi aidën napatsiashe? Isnu, quetanec titingue choec: —ěAda cho? —quepondash.

¹⁶Adoaquien: —ěAtotsi quec ěbëd icquidbëd comapenec onquecuedede? —quepondash Esus.

¹⁷Adshobien: —Chuiquid Dapa, mibi ismenuen con mado bëombi. Mayan icsan buëd oncamenquio yaid nec. ¹⁸Aid Mayan icsan comapenen nebudeniac ěcbacush-ěcbacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquio yanesho, Bëombique. Bëdame, cauidombi mibëd icquido chuiquin. Adoaqui bëdamenquio iccosh —quepondash mayan icsan buëd onquetiapimbo icmiaidën papa.

¹⁹Aden chuisho tantiash abëd icquido caic: —Esus nadatiambocquid nec quequin ěbi tantiesha mibi nepec. ěTedectsi icshun ěmbi chiacpaden mimbi tantiabempe? Mibi tantiesha icsho ěmitsipadembimbi tantiampe? —qeshumbic: —Madompi bec cho —capondash Esusën.

²⁰Adsho tantiashun bëpondash. Bëshobi Esus istanquin mayan icsan abi dapuduedaid comapenen cuididicamiampondash. Aden nac madompi uebudec ěcbacush-ěcbacushpambo yec cuididiquepondash.

²¹Adsho isash: —¿Tedtsi seta matamec ad iccondashe? Chui. Tantanu —quepondash Esus madompin papa chiec.

Adoaquien: —Bacuë ictsequi ad iccondash. ²²Cuëte dëtsiadaoid nënedeniosh abi dapuduedaidën. Actetsen nënedeniosh unësmenuequin. Mibi bédamequidquo icquin ëbëdta tantiaquin ëbi con mado bédameshun —quepondash madompin papa Esus caic.

²³Adoaquien: —¿Mibi bédamequidquo icquin ëbi con mado bédameshun quecta ique? Nuquin Papa nadatiambocquin naquid nec quequin tantiaquidën tantiacpadomboen Nuquin Papan naindac —quepondash Esus.

²⁴Adsho tantiash: —Tantiembi. Ëmbi abimbo tantienquiocsho isun ëbi tantieme, Icho —quepondash madompin papa Esus caic.

²⁵Adsho tantiashun matses dadpen titinquec chosho isun mayan icsa chuiquin: —Matses buëd oncamenquiocquid mibi nec. Ademibidi tantiametiapimbo icmequidbidi mibi neque. Ambo tabadenquo yec dapuduen —capondash Esusën.

²⁶Aden chiaquien sidquec madompi cuididiquenubi dapuduempondash. Adnubien unësacimboec madompi uesho isash: —Unësosh —quepondash isquido. ²⁷Adnubien madompi mëdintanquin Esusën uëtsëndopondash. Adoac abembi nidtopondash.

²⁸Adnubien shubun puduedacsho: —¿Atotsieshumbimbi mayan icsa dapuduemetiapimbo icpo? —quepondash abëd icquido Esus caic utsibon tantienquiocnobi.

²⁹Adoaquien Esus: —Dapuduen quequinuidi chuibudaqui adquidquo dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa

dapuduen cac dapuduenendac —quepondash.

Abi unës uate chuioaid
(Mat. 17.22-23; Duc. 9.43-45)

^{30,31}Aden chianec nidaïd Cadidia caïd matanec nidpondash. Nidquimbi, Ëbëd icquid 12tedtsëqui chuibanu, quec utsibo ismenquo yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuempndac —quepondash Esus. Abi uincuentequid chiecshenda adec Esus onquepondash. ³²Aden chuïsho bédamboen tantienquo yequi dacuëdec ëbi bédamboen tantiamequin chui quetiapimbo icpondash abëd icquido.

¿Mitsicquid chuïquid dapa icpec?
quequin chiaïd

(Mat. 18.1-5; Duc. 9.46-48)

³³Adanec shubu dadpen icquid Capednaun caïd yacno Esus choapondash. Adec choash shubun puduedshun: —¿Podquedën choec atotsi chiec onquecuededo? —capondash Esusën abëd icquido chuïquin. ³⁴Adsho tantiash cuëdenquiocpondash abëd icquido. ¿Esusbëd icquid mitsicquid chuïquid dapa icpeque? Tantanu, quec onquequin ambi chiaïd chienquo yec tabadpondash. ³⁵Adec tabadnubi abi tsadacnoëshi: —Cho —quiampondash Esus abëd icquido caic. Aïdo choacsho isash: —Chuïquid dapa ëbentsëqui icnu quequid utsi nashunquidbidi ictiad —quepondash Esus.

³⁶Adec onqueshumbic bacuëmpi abentsëc mëdintanquin abëd icquid tabadacno nënantanquo tsadumbudpondash. Aden tsadumbudshun bacuë icuquequi: ³⁷—Esus tantiaquid nebi quequin ismequin bacuë yuedquin nashunquid ëbi yuedquin

nashunacimboecquid nendac. Ëbi yuedquin nashunquid ëbi chomiondaid Nuquin Papa yacno yuedquin nashunoacimboecquid neoaindac —quepondash Esus abëd icquido chiec.

**Nuqui chieshënesa nuqui bëdamboen
chuiبانquid nec quiaid**
(*Mat. 10.42; Duc. 9.49-50*)

³⁸Adnubien utsin naid chiec Uan onquedopondash: —Icbo, mimbi chiacpadomboen utsin chuisho tantiapombi. Aidën: “Esus nadatiambocquin naquidquio nec, quequin tantiembi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbëd icquidpenquio mibi neque. Adenda quequin chuipombi —quepondash Uan.

³⁹Adoquien Esus: —Padicnuna. Nadatiambocquin naquidquio Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec. ⁴⁰Nuqui chieshënesa nuqui bëdamboen chuiبانquid adquid nec. ⁴¹Abimbo chiembique. Tania. Esus tantiaquid nec quequin mibi nashunquid Nuquin Papan cuidnanquin bëdamboen naoaindac —quepondash Esus.

**Icsa uanquin tantiabenabicquid
ismequid cuidendac quiaid**
(*Mat. 18.6-9; Duc. 17.1-2*)

⁴²Abi Esusën onquequin chuiبانec: —Adembidi abi icsacpadomboen bëdamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabicsho cuënote yuëmbocquidbëdta tëtaneshun acte dapa nënepatecnëdan. ^{43,44}Adembidi mimbi icsamboen tantiaquin mishaid ëntiapimbocquin ismedeniác adomboembidi utsin tantiec. Bednu

quenquio yec mëtaniacimboec tsad ënëdenquio yec chian anëdënquiacno nidmane quiaish. ^{45,46}Adecbidi capuquin mibi icsaid mimbi ismebeneque. Capunu quequin tantienquio yec tateshuniacimboec tsadta ënëdenquio yec chian anëdënquiacno nidmane quiaish. Adec mibi tsadnuc adqueiecbidi mimbi ismiaid tantiec tsadendac. ⁴⁷Adecbidi ëshën isec mibi icsaid ëntiapimbocquin mimbi ismedoniác adomboembidi utsin tantiec. Ëshë chicshuniacimboec tsad ënëdenquio yec chian anëdënquiacno nidmane quiaish ma mibi tsadacpadec mimbi ismiaid tsadoapanu. ⁴⁸Icsa uadenequin ënenquio yash unësash chian anëdënquiacno nidash unësenquiocshobi chodquiaid pequid macun mibi pendac. Ënëdenquio yec chian anëdënquiacno mibi tabadendac. Icsadenequin ënenquiocquid comapenen cuidtequid nendac. ⁴⁹Sa casecac pambid batambo yacimboec Esuspadquid icnu quiaish mibi icsaid ënëdnuen mëmunec mibi bëdambo yampec. ⁵⁰Sa batambocquid bëdambo iquec. Sa batambochoedi batapenquio yec icsasho ðmitsipadentsi batambo icmeoapec? Sa batambocquid casecac daëdash batambo yacpadec utsibëd bëdamboec tabadta —quepondash Esus.

Aton chido bedshun nidmequid
(*Mat. 19.1-12; Duc. 16.18*)

10 ¹Aden abëd icquido chuiquin nainashic Esus aidobëdi nidaid Cadidia caid yacnoësh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen cho-choapondash. Adec cho-chosho isun Nuquin Papan chiaid chuibanoapondash Esusën.

²Adecbidi cho-choquid padiseyobon Esus Nuquin Papan chiaid icsamboen

chuinu qeshun: —Aton chido bedash bunenquo yanshun cuemec. ¿Aden naicta bēdambo iqueque? Tantienu. Chui —capondash Esus chuiquin.

³Adoaquien: —¿Atotsi quequin Moisesën chuiampic? —queoapondash Esus.

⁴Adoaquien: —Aton chido bedash bunenquo yanshun, Con chido icsambocquid nec, quequin ambi tantiacpaden aton bēnēn dada uashun nidmiacsho isash, Padi, quenuiocpampic Moises —quepondash padiseyobo.

⁵Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenuio Moises icpampic. ⁶Nadomboen Nuquin Papan tauapampic. Dada abentsēc uashumbic chido abentsēcibidi uashun dada menepampic. ⁷Adomboembidi nanuec dada aton tita aton papabēd tabadenquo yec aton chido bedash abēdi ambi quēnē uaidēmbi tabadec. ⁸Aden aton chido bedash tabadequi matses abentsēc icboedi daēdec. Matses daēd icboedi abentsēc yacsimboec tabadec. ⁹Aden dada aton chidobēdta Nuquin Papan daēd uacsho ma cuēshēdmenquo icpanuna —quepondash Esus.

¹⁰Aden chiash shubun puduedacsho: —Mimbi chuiboed ēbitedi tantieme —capondash abēd icquidon.

¹¹Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. ¹²Adembidi chido aton bēnēn bedac aton bēnē nianshun dada utsi bedmequid Nuquin Papan menepampid niacquin tantiesa neoaic —quepondash Esus.

Esus yacno bacuēbo bē-beaid
(Mat. 19.13-15; Dcu. 18.15-17)

¹³Adnubien: Con bacuē mishquin Esusën bēdambo icmetsiash, quequin

Esus yacno aton bacuēbo anin bē-bēpondash. Aden bē-bēsho isun: —Padi. Esusën naid utsi neque. Bacuēbo buantan —capondash Esusbēd icquidon.

¹⁴Aden nidmesho isash nēishash: —Bacuēbo nidmenda. Ma cho-chono.

Anin chiacpadomboen tantiaquidquo bacuēbo neque. Adomboembidi badedquo Nuquin Papan chiaid tantiendac. Nuquin Papan shubu abentsēcquēn tabadquid aido nec.

¹⁵Abimbo chiembique. Tantia. Nuquin Papan chiaid bacuēbon badedquo tantiacpaden tantiesa Nuquin Papa yacno puduedtiapimbo iquendac —quepondash Esus. ¹⁶Aden chuitanquin bacuēbo dayumbanquin mamishec, Nēid bacuē bēdambo icme, Papa, quequin Nuquin Papa chuipondash Esusën.

Na dadpen icquid chiaid
(Mat. 19.16-30; Dcu. 18.18-30)

¹⁷Aden bacuēbo chianec auēshquo puduanec nidshobien dada abentsēc titinquec choquin bēquedtanec danēshēn sebudash tsadec: —Chuibanquin tantiamianquid, bēdambocquid mibi neque. ¿Nuquin Papan shubu abentsēcquēn tabadnuequin atotsimbi napeba? —quepondash choboed Esus chiec.

¹⁸Adoaquien Esus: —¿Nuquin Papabēdtabidabi mibi bēdambocquid nec, ēbi cape mimbi? Nuquin Papauidsēcqui bēdambocquidquo nec ¹⁹—quequin chiec abi onquec:

—¿Nuquin Papan nadomboen nata quequin dada uamiampidtedi nabanquidta ne? Aidedi mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, ampenda; adecbidi, utsi chiec muanda; adecbidi, utsin na bedesabimboec

muainda; ademibidi papabëdtan titan chiaid chieshënenda.” ¿Aidtedi Nuquin Papan dada uamiampid nabanquidta ne? —quepondash Esus choboed caic.

²⁰Adoaquien: —Abimbo chiembique. Tantia, Icbo. Aidtedi nabanquidquo nebi. Bacuëtsëc icquimbi adquid nabanondambi ënenquiocquin —quepondash choboed.

²¹Adsho tantiash, Aidbëd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquid menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquid mibi iquendac. Adec Nuquin Papa tantiaquidquid yec ëbëd iquec cho —quepondash Esus.

²²Adsho tantiash choboed mamënenquio yec unësquio yec nidpondash con na menebantiapimbo iquebi quiash.

²³Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepondash abëd icquido chiec.

²⁴Aden Esusën chuisho tantiash, ¿Abimboda capec? quequin ambibi tantiec abëd icquido otacquo tabadsho isec Esus: —Abuido, Nuquin Papan shubu abentsëquën matses badequid puduedtiapimbo iquec. ²⁵Adembidi shëcuën puduedte nidaidën capuquid dapan badequid tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid matsesën badequid tantiatiapimbo iquec. Ambi

tantiacpadequi puduedte bunec —quepondash Esus.

²⁶Adsho tantiash abëd icquido, ¿Abimbobida capec? quetsëcquiec onqueducuedpondash. Adec tabadequi: —Ambi tantiacpadequi puduedtiapimbocnoc ¿tsutsi puduedquid icpeba? —quepondash abëd icquido Esus chiec.

²⁷Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimbocnoc Nuquin Papambien abi yacno yuedanquid mibi tantiamendac —quepondash Esus.

²⁸Aden chiaquien Petedo nadpondash: —Chuinu. Tantia, Icbo. Mibëd icnu, quequin abitedi nianondambi. Ademibidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chiec.

²⁹Adoaquien: —Abimbo chiembique. Tantia. Esusbëd icnu qeshun Nuquin Papan shubu abentsëquën tabadte iquec quequin chuinuequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidtedimbocsho ³⁰daëd uaquin Nuquin Papan menendac. Nëbi shubu utsin-utsinquiec mibi puduedcuenec. Adecbidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnu mibi chieshënquidbidi iquendac. Yuecash ënëdenquio yec Nuquin Papan shubun mibi tabadendac mibi chieshënquid nibëdacno.

³¹Nidaidëshun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid icboedi Nuquin Papa yacno tabadquin chuiquid iquendac. Nashunesa yec chuiquid

icboedi Nuquin Papan shubun
puduedash utsi nashunquid adquid
iquendac —quepondash Esus.

Ëbi unës uaindac quequin Esusën chiaid
(*Mat. 20.17-19; Duc. 18.31-34*)

³²Aden chianec Edusaden caid yacno
podquedën nidec Esus bëyucanec
nidpondash. Edusaden yacno padpidec
choacshobini bedshun unës uaic quequin
chiashi, ¿Dacuëdenquioda ambo Esus
nidoapec? quetsëcquiec abëd icquido
tsyuec nidanepondash. Adnubien abi
tsibanquid utsibo dacuëdecbidi
nidanepondash. Adnubien: —Ëbëd
icquidouditsëqui padpiden chiuoanu
—quiash Esus nidtuidshun cho-chosho
isquin naden abi mëyante chuiquin
tauapondash: ³³—Chuinu. Bëdamboen
tantia. Nuquibi Edusaden yacno nidec.
Ambo nidacsho ëbi bedshun ëbi
matsesaid Nuquin Papan madombo
isadaidbo tsusiobo menendac. Aden
meniac icsaquidbimboecnuc ëbi
icsamboen chuibanec onquecuedash,
Icsambocquid Esus nec. Unës
uamequimbien ictiad, quendac ëbi caic.
Adec onqueshun ëbi buanshun
isadaidpembo ancaquid ëbi
meneoaindac. ³⁴Aden meniac bedshun
aidon ëbi oncain
mamëns humbededquimbi
dacuisthuashumbi cuestanquin buanshun
ëbi unës uaindac. Aden unës uac daëdec
ushash uincuenoaindabi —quepondash
Esus abi uincuenta ambibi chiec.

Ëbi daëdi nashunta Acobo Uambëd quiaid
(*Mat. 20.20-28*)

³⁵Aden chiaquien Acobo Uambëd
Esusën dayuntsëqui choash: —Mibi
chuinu. Tantia. ¿Ëbi daëdshun
chiacpadomboen ëbi daëdi
nashunenquioda mimbi icpe?
—quepondash.

³⁶Adoaquien: —¿Atotsimbi mibi
nashuneque? Ëbi chui. Tantanu
—capondash Esusën.

³⁷Adoaquien: —Abuc nidoash chuiquid
dapambo mibi icquin utsi ismequin min
dayunquio ëquë tsadumbudcuenquin ëbi
daëdi tsadunta —capondash Uanën
Acobobëdtan Esus chuiquin.

³⁸Aden aid daëdshun chiaquien:
—Tantienquiocquin mimbi chioc.
Icsaquid matsestedi nec, quequin
Nuquin Papan aido cuidenquiocquin ëbi
aton madombo bëdambocquidded
cuidendac. ¿Ada ëbipadquid mibi
icpatsia? —capondash Esusën.

³⁹Adoaquien: —Ai, adquid tantiembi
—quepondash.

Adoaquien: —Ai, adomboembidi
mimbisen tantiendac —quepondash Esus.

⁴⁰Aden chiec abi onquec: —Abuc nidash
chuiquidquio iquec con dayunquio ëquë
tsadbudcuenec tsadec cho, quetiapimbo
iquebi. Nuquin Papambien ambi
tantiaidquio aden chiendac. Ëmbi
padenquio iquec —quepondash Esus
Uambëdta Acobo chiec.

⁴¹Aden Esusën chiaqui abëd
icquidquio utsitedi Acobobëdtan Uanën
chuiboed tantiash nëishcuededpondash.

⁴²Adec nëishash tabadsho isash: —Cho
—quepondash Esus. Aden chomiash:

—Utsi namequid isadaidpembo nec
quequin mimbi tantiec. Aidon matses
utsi yuaquin mëyanquin namebanec.

⁴³Aden namesa mibi nec. Chuiquid dapa
icnu quiash utsi nashunquid icta.

⁴⁴Adecbidi tsusio icnu quiash
yuabimboe yec utsin namiaid icta.

⁴⁵Adquid icnuec Nuquin Papan
madombo matsesash nidaidën tabadobi.
Ancanquid iquenquio yec
nashumënquidquio nebi. Adquid yec
matses icsaid bedshunash ëbided
cuidadec unësendabi —quepondash
Esus.

**Bëshuaid, Badtimeyo cuëmëdquid
bëdamiad**

(Mat. 20.29-34; Duc. 18.35-43)

⁴⁶Aden chiashic Edico caid yacno chonobi abi tsibanquid utsibo dadpen cho-chopondash. Ambo tabadash abitedi puduampondash. Pudianash nidquin isaquien bëshuaid, Timeyon mado, Badtimeyo cuëmëdquid podqued cuëman tsadpondash. Piucquid bednu quequin cainec podqued cuëman tsadpondash. ⁴⁷Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa, Dabidën madon, ëbi tantiaquin nashun —quequin chiec cuëdpondash bëshuaid.

⁴⁸Adec cuëdsho tantiashun: —Esus cuënenquo yec otacquo tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

⁴⁹Adoac nidtuidshun Esusën: —Cuënuquid chome —capondash. Adoquien: —“Chome,” queque. Nidtoash nid —capondash utsibon.

⁵⁰Adsho tantiash bëshuaid aton dashcute bëntsecquid chicanec badedquo nidtoanec Esus yacno chopondash. ⁵¹Adec chosho isun: —¿Atotsimbi mibi nashumpeba? —capondash Esusën.

Adoquien: —Iste bunebi, Icbo —quepondash bëshuaid.

⁵²Adoquien: —Esusën ëbi bëshuaid bëuquec quequin mimbi tantiacpadquiec mibi bëdanoque. Nidec nid —Esus quenubi isbenquiopondash bëshuaidën. Adec bëdänshun Esus nidsho isun tsibampondash.

**Chuiquid dapabimboec yec Edusaden
yacno Esus choaid**

(Mat. 21.1-11; Duc. 19.28-40; Uan 12.12-19)

11 ¹Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidedi macuësh Odibos caid potsembo icpondash. Ambo choash ëbëd icquid daëd shubuno nidmenu quequin tantiec nadpondash Esus: ²—Në shubu dadpen yacno nidec nid. Ambo nidshun cabayobiecquidën bacuë caniabictsëcquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid tëchicshun sananquin bëta. ³Aden bedsho isun, ¿Atotsi canun aid bede? cac, Bëoaambi. Nëid nuquin icbo bunaid nec, cata. Mimbi aden chiac, Buanec nid, quendac —quepondash Esus abëd icquid daëd chiec.

⁴Aden Esusën chiaquien abi daëdi nidpondash. Adec nidanequimbi cabayobiecquid caniabictsëcquid shubu shëcuë cuëmano tënëshac tsadsho istuidshun tënëshaid tëchicpondash.

⁵Aden tënëshaid tëchicsho isun: —¿Mitsipaden tantiaquin ëmbi tënëshaid mimbi tëchiqueque? Tantanu. Chui —capondash anocquidën.

⁶Adoquien: —Tënëshaid tëchicshun bëta, con icbo quebocpaden naimbi —capondash tëchicquidën.

Adoquien: —Buanec nid —queoapondash.

⁷Adoac Esus yacno buampondash. Aden bëshun aton dashcute bëntsecquid chicshun cabayobiecquid capucpondash ma chuiquid aidën catsadtonoeshun. Adoaidën Esus catsadtopondash.

⁸Adembidi chuiquid Esus nec quequin

ismequin utsibontsen aton dashcute bëntsecquid chicbededshun podqued ansambampondash ma chuiquid dapa bédambocquid capunueshun. Adembidi tantiaquin utsibon budëdbiequid podo tebededshun podqued ansambanoapondash. ⁹Aden ansambanash matses dadpen bëyucanec nidanenubi Esus nënantanquio nidnuc aidtedbidi tsyuec choquin tsibambëpondash. Adec abitedi nidanec Esus tantiec nadece cuëdëncuededpondash: —iAdeduya! Nuquin Papan bédambo icmiad ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuëmëdquidën tsyuecquid, shubu abentsëqui tabadquido chuiquid dapambo choec nec. ¹⁰Ëbi chuiquid dapa Nuquin Papan abuc tabadquidën chomiaid Esus nec. Nuquin Papa bédamboshë iquec. iAdeduya! —quec cuëdëncuededpondash Esusbëd nidquido.

¹¹Aden cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus puduedpondash. Adec puduedshun abitedi isbanash ushë budtsambi Betania caid yacno nidaneoapondash Esus.

Cuëte bacuëesa chiaid

(Mat. 21.18-19)

¹²Abadiadtsashi Betania yacnoësh nidanec Esus bundopondash. ¹³Adec bundoshombi cuëte icueda caid podo buntac-buntacpambo ancuenquio nidsho istuidec Esus: —Icueda podo buntac-buntacpambo podoash nideque. Isbono. ¿Bacuëashida neque? —quianec nidpondash. Adec nidquimbi icueda podoudiquio icsho ispondash. Ushë utsin bacuëtiadquidi bacuëabi podopac.

¹⁴Ad icsho isun Esusën: —Adequi bacuëesa icsho ma matsesën chenquio icpanuna —capondash. Aden chuisho tantiapondash abëd icquidon.

Nuquin Papa tabadte shubu uashunaid yacnoshon cuemiaid

(Mat. 21.12-17; Duc. 19.45-48; Uan 2.12-22)

¹⁵Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedoapondash. Adec puduedshun piucquid bedquin piucquid sanaid cuestetedi bidiacbanquin piucquid bednun nidaidën capuquidbëdta podochoquid chedo menebanquidën tsadtetsen nebudquin icbotedi puduemebampondash. ¹⁶Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin. ¹⁷Aden chushcashic: —¿Ëbi tabadte shubu uashunaid matsesën ëbi onquianete shubu iquendac, quenuioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. ¹⁸Aden Esusën chuisho tantiash, Icsambocquid Esus neque. Unës uatiad, quequin ambibi tantiabededec isadaidbo tsusiobo tabadcuëdedpondash. Utsiboen: —Chuiquid dapan chiacpadomboen Esusën chiec —quepondash. Adsho tantiash, Esus bednu, quetiapimbo yec dacuëdcededec tabadpondash isadaidbo tsusiobo. ¹⁹Adnubien inchëshbudtsëqui Edusaden yacnoësh nidoapondash Esus.

Cuëte bidiquiaid

(Mat. 21.20-22)

²⁰Abadiadtsashi Edusaden yacno nidoaquimbi cuëte icueda caid

bidiquiacsho istuidpondash. ²¹Aden istuidash Esusën icueda bacuëesa chiaid tantiec Petedo: —Cuëte bacuëabicsho mimbi chuiboed bidiquiaye. Is, Icho —quepondash.

²²Adoquien Esus: —Nuquin Papa nadatiambocquin nabanquid nec, quequin tantiaquiota. ²³Abimbo chiembique. Nuquin Papa nadatiambocquin nabanquidquo nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuësh cain, Mananuc tabadoedi adquiecbidi acte nantan tabadoata, mimbi cac nëid macuësh acte nantan tabadoaindac.

²⁴Ëmbi chiacpadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac. ²⁵Aden Nuquin Papa chuinish mibi utsin icsambocquin naid tantienquo yec bëpiscudta. Adsho abucshun isash Nuquin Papan mimbi icsa uanquin naid tantienquo yec bëpiscudendac.

²⁶Adenquo mibi icsho isun Nuquin Papan mibi icsa uanaid bëpiscudenquiocquin mimbi chiaid tantiatipimbo iquendac —quepondash Esus abëd icquido caic.

**¿Mitsicquidën chuibanta
caid mibi ne? quiaid**

(Mat. 21.23-27; Düc. 20.1-8)

²⁷Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: ²⁸—¿Mitsicquidën chuibanta cac chuiquid dapabimboecquin mimbi chieque? Tantianu. Chui —capondash.

^{29,30}Adoquien: —Adembidi ¿Atotsi tantiaquin mimbi chuipe? Chui. Tantianu. ¿Matses mentondaidën, Uan padon Nuquin Papan

chuimiapadomboen nabanquina nadiondash? Padenquo, quequin, ¿Ambibi tantiapadomboen Uan padon naondash, quequina mimbi tantiapeque? En chui. Tantianu. Aden mimbi chiac ëmbitsen mibi chiembi —capondash Esusën tsusiobo chuiquin.

³¹Aden Esusën chuisho tantiash udictsëc nidash isadaidbo tsusiobo onquec nadcuededpondash: —Nuquin Papan tantiamiapadomboen Uan padon naondash, nuqui qesho tantiash, ¿Atotsieshun aidën chiaid tantienquo icconda? quetsiash Esus. ³²Naden Uan padon ambi tantiapadomboen naondash, nuqui qesho tantiashun, ¿atotsi napatsiash Uanën chuisho tantiondaidon? Aidon, Nuquin Papan chuimiai Uan pado niondash, quequin tantiabededquin nuqui cuënoten seshunetsiash —quecuededpondash. ³³Aden chiec onquecuededashic —¿Tsuntsin tantiamiapadomboen Uan padon nabampondash? quequin tantienquo iquembi —quepondash isadaidbo tsusiobo Esus chiec.

Adoquien: —¿Tsuntsin tantiamiapadomboen Uan padon nabampondashba? quequin mimbi chienquo yapadambi ëbi chuiquin tantiamequid mibi chienquo icoaimbi —quepondash Esus abi chieshënkuido isadaidbo tsusiobo chiec.

Tied icbo nashunta quequin chiaid

(Mat. 21.33-46; Düc. 20.9-19)

12 ¹Aden chiashe, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tanta. Icbon aton tiedën uba caiduidquo nitsinshun cüeste bënitsinaidën otadnidec cuidian-cuidianec dadpen bacuëc. Sinash didiesho icbon bedec. Aid nitsinshun icbon daquënë uaic.

Aden daquënë uashun yuecshun uba
ënë chinun tsuc-tsucte nacnemposh.
Aden nacnenshun uba ampenushe
queshun isec tabadte shubutsen shubu
uaposh. Aden aid shubu uash
nidnuequin abi tied nashunquid, Ista,
quequin chianec nidposh icbo.

²“Adec nidequi nidaid utsi yacno
choash yuec tabadash, Uba sinashe. Con
uba bedtan, cac, aton yua nidposh.

³Adec nidboed tied yacno chosho isun
tied icbo nashunquidon bedshun
cuestanquin menenquiocquin aton icbo
yacno nidmeaposh. ⁴Adoacsho
isboshic, Uba bedtan, cac yua utsitsen
nidoaposh. Tied yacno chosho bedshun
cuestanquin aidtsen aton icbo yacno
nidmeaposh tied icbo nashunquidon.

⁵“Adosho isash, Padi,
quenquiocquimbidi, Con uba bedtan,
cac yua utsitsen nidoaposh. Aidi tied
icbo nashunquidon cuesuneposh.
Adembidi, tied icbon nidmiaid
utsi-utsen abi tied nashunquidon
cuesosh. Aden nabanquimbi utsi-utsen
cuesuneposh.

⁶“Adsho isash tied icbo nadposh:
Nëid, con madombo abentsëqui nec. Ëbi
cudasaid nec. Aidi tsyuec con tied yacno
nidmembi. Aidi chosho isun, Tied icbon
madombo nec, quesahun bëdamboen
istsiash, quesahun aton madombo
nidmeposh.

⁷“Aden nidmiac ancuenquo chosho
isash, Tied icbon madombo choeque. Is.
Aton papa unësan aton papa yacpadec
icbo icoanushe quesahun tied icbo nuqui
icnun aidi cuesunenuna, quecuededposh
tied icbo nashunquido.

⁸“Adec onquetanquin aton icbon
madombotsen bedshun cuesuneshun
daquënë uaid mabudacquin nebudposh.
⁹Adoacsho tantiashun ÷atotsi tied icbon
napec? Naden naindac. Utsibëd aton
tied yacno nidshun abi nashunuidboed

cuesuneshun utsibo abi nashunquido
icmendac —quepondash Esus.

¹⁰Aden chuishumbic Esusën:
—÷Adomboembidi chuiquin Nuquin
Papan dada uamiampid tantienquioda
icco? Nad iqueque. Tantia.

“Shubu uanuequidën buintad
isuidaidi utsin abia nitsinaid
icoaposh.

Adquiobidi Nuquin Papan
chuimiaid matsesën tantiauida
iquendac.

¹¹ Nuquin Papan naid bëdambo iquec.
Ambi Chomiaid abi yacno yuedquid
icmequin Nuquin Papan
nadatiambocquin naid nec
quequin abi tantiaquidënquo
tantiec”

—quepondash Esus Nuquin Papan
chiampidquido chiec. Nuquin Papain
shubu abentsëquën abi tantiaquido
yuedanquid nendac, quequin utsi
chiacimboc abibi chiadquin Esusën
chuibampondash.

¹²Adsho tantiash, Ëbitedishun
isuidaidbimboecnuc chuibanec quequin
tantiec isadaidbo tsusiobo Esus
bedtiadquido icpondash. Adnubien Esus
onquesho dadpenshun
tantiabededpondash. Dadpen icsho isash
dacuëdcuededec Esus bednu quenquo
yec nidanepondash chieshëmënuquido
isadaidbo tsusiobo.

**Bec cho quequin bedshunquid nec,
quequin chiaid**

(Mat. 22.15-22; Duc. 20.20-26)

¹³Isadaidbo tsusiobo nidshun
padiseyobo edodesbobëdta istuidshun:
—Nëidon Esus icsamboen chuimetsiash
—quesahun aido Esus yacno
nidmepondash. ¹⁴Aden nidmiac Esus
yacno choshon abentsëcshun Esus
nadopondash: —Ambia tantiaquid,
matsesën tantiamiacpadpenquiocquin

mibi yec Nuquin Papan tantiacpadomboen chuibanquidien mibi nec. Adquid icquin ëbi chui. Tantanu. Shocosh piucquid bec cho quequin bedshunquid, isadaidpembe ancaquid, Sesad cuëmëdquid nec. ¿Aden meniaid bëdambo iquec, quequin Nuquin Papan chiaidta nepec? ¹⁵¿Adambi menepaba? —quepondash padiseyobobëd edodesbo Esus caic.

Adoaquien, Ëbi icsamboen chuimenuec adec onquec, quequin ambibi tantiec: —Shocosh piucquid bec cho ma isnu —quepondash Esus.

¹⁶Adsho tantiashun bëpondash. Adoaquien: —Sananquin isme. ¿Tsutsibimboecnuc dada uaid iqueque? Chui. Tantanu —capondash Esusën.

Adoaquien: —Isadaidpembe ancaquid, Sesadbimboecnuc dada uaid nec —quepondash.

¹⁷Adoaquien: —Ai, aidën na nec. Aid bec cho, qesho meneta. Adembidi Nuquin Papa Nuquin Icbo icquin, Nata, cacpadomboen naban —capondash Esusën.

Aden bëdamboen chuisho tantiash, Bëdamboenshenda tantiapec, quequin ambibi tantiec Esus chieshënkuido tabadcuededpondash.

Abuc tabadequi, ¿mitsicquidën chido neque? chui quiaid

(Mat. 22.23-33; Duc. 20.27-40)

¹⁸Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido nepondash. Aido cho-choash nadpondash: ¹⁹—Moisesën dada uapampid nad iqueque. Tantia. chuinu. Chidochoquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaidbimboec ma icpanuna, quequin chuipampid nec —quepondash

saduseyobo. ²⁰Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash. ²¹Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën ²²aton utsi unësan aid chidobidi bedshun tishmiambo yec unësoapondash bacuë nibëdquio yec. Adecbidi dadatedi unësbudnepondash. Adecbidi chidotsen unësoapondash. ²³Adec unësash abuc tabadequi, ¿mitsicquidën chido aid icpatsiashe? Chui. Tantanu —capondash saduseyobon Esus chuiquin.

²⁴Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoac. ²⁵Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bëda unësesa yacpadquiec matses uincuenash unësesa iquec caidesa nendac. ²⁶Adembidi unësash uincuenaid tantianu qeshun ¿Moisesën dada uaid isenquioda ictionda? Aidën cuëtempi abibi nëdënqesho istanec nidtuidquin naded Nuquin Papa onqesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën. ²⁷Nuquin Papan chiacpadpenquiocquin Moisesën dada uapampid nec quequin mimbibí muaquin chienda. Chuinu. Tantia. Unësaidën Papa nebi quesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiate icsho ambi uincuen uatequido Nuquin Papan

tantiendac —quepondash Esus matses uincuente iquec quequin saduseyobo tantiamenuc.

Naden nata quequin chiaid ¿mitsicquid adquidpadquid utsi nibèdpec? quiaid
(Mat. 22.34-40)

²⁸Adec Esusbèd saduseyobo onquecuedednubien tsusedpabon nadomboen nata quequin chiaid tantiamequid abentsëc chopondash. Bèdamboen Esusën saduseyobo chuisho tantias Esus icsamboen chuimenuc aidtsen: —Èmbitsen tantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibèdpec? —quepondash.

²⁹Adoaquien Esus nadpondash: —Nèid chiaidpadquid utsi nibèdeque. Chuinu. Tanta. “Nuquin Icbo Nuquin Papa nec. Nuquin Icbo Abentsëcquiobi iquec. ³⁰Adquid icsho èbi tantiaquid isash bèdambo iquebi camequin Nuquin Papa tantiadoneta. Adecbidi èbi yapcadecuidi icnu quenquo yec Nuquin Papa bunacpadquiec icnu quec bèdamboec tabadta. Adembidi ambi tantiacpaden tantianu quequin adombota. Adembidi aid tantiaquin bèdamboen nabanquiota. ³¹Aden nabanquin Nuquin Papa bèdambo icmequin utsibo adembidi bèdambo icmequin nabanta. Èbi tantiaquin utsibon èbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibèdec —quepondash Esus.

³²Adoaquien Esus icsamboen chuimenuc choboed nadpondash: —Mimbi chuiboed abimbo iquec. Nuquin Papa abentsëcquiobi iquec. Aidpadquid utsi nibèdec. ³³Adembidi, èbi tantiaquid isash bèdambo iquebi

Nuquin Papa camequin tantiadoneta. Adecbidi mimbi tantiacpadomboen nainquo yec Nuquin Papan tantiacpadquiec icnu quec bèdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bèdamboen nabanquiota quequin chuitequidpadquid utsi nibèdec. Aden Nuquin Papa bèdambo icmequimbi utsibo adembidi bèdambo icmequin nabanta. Èbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibèdec. Aden naquid Nuquin Papan bèdamboen isendac. Aden naisa, Con na Nuquin Papa menenu, qesho Nuquin Papan bèdamboen istiapimbo iquendac —queoapondash choboed.

³⁴Aden choboedën bèdamboen chuioasho tantias: —Nuquin Papan shubu abentsëquën tabadaid mimbi bèdamboen tantiatsempoc —quepondash Esus.

Adoac Esus icsamboen chuimenu quetiapimbo icpondash utsibo.

¿Tsuntsin mado Quidistu nepec? quiaid
(Mat. 22.42-46; Dc. 20.41-44)

³⁵Abi icsamboen chuimenuquid utsi nibèdnuc Nuquin Papa tabadte shubu uashunaidën tabadquimbi Esusën Nuquin Papan dada uamiampid chuibanquin nadopondash: —Nuquin Papan chomiaidquio tsusedpa Dabidën mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tanta. Chuinu. ³⁶Naden Nuquin Papan Mayanën Dabid chuimiampic:

“Icbo utsi icsho mibi chiembique.

Tanta, mado, quequin chiec Icbo Dapa nadpampic:

Èquë con dayun abiucquio cainec tsadec cho ma mibi

chieshënuquidtedi mimbi namiaid
ma icpanu,”

quequin chuipampic. ³⁷Aden Nuquin Papa icbo dapanquo aton dayunquo chomiaid chiec Dabid pado, Con icbo nec, quiashic, ìmitsipadquiec, Con mado nec, queopampic? Nuquin Papan chometequid, aton mado, Dabidën icbo yec ìmitsipadectsi Dabidën tsyuecquid icoapec? —quepondash Esus abibi chiadequi.

Aden chiec onquesho tantiash badedquo tantiatiadquo yampondash utsibo. Bëdamboen chiec, quequin comapenen tantiapondash.

**Nuquin Papan chiaid tantiamequidon
chuisho tantienda quiaid**

(Mat. 23.1-36; Duc. 11.37-54; 20.45-47)

³⁸Aden tantiamequimbi Esusën nadopondash: —Tsusedpabon nadomboen nata quequin chiaid tantiamequidën chuibansho tantienda. Aido nadquid iqueque. Tania. Tsusiobimboec isadnu quiaish abi dasiuidaid ënapen icquid dasiuidtenequid aido nec. Adecbidi tantiaquidquo yec tsusiobimboec isadnu quiaish aton matses dadpen yacno capuquid nec. ³⁹Adomboembidi ëbi isoanu quiaish Nuquin Papan chiaid chuibante shubun puduedash tsusiobëd tsadec. Adomboembidi ismenu quiaish isedquido dadpen yacno choash shubu icbon dayunquo tsadoaic. ⁴⁰Aido bëdamboen nashumbimboen nianten na ampequid nec. Adembidi bëdambocquid nec camenuen yuen Nuquin Papa chiec. Adquid comapenen cuidtequid nendac —quepondash Esus.

Nuquin Papa tantiaquin nianten meniaid
(Duc. 21.1-4)

⁴¹Aden chiashic aton na bedtequid sandote tabëcaid tabadacno choash isec

Esus uano tsadpondash. Nuquin Papa tabadte shubu uashunaid tantiaquin nashunquidën nacentsiash quequin aton na bedtequid bë-bëquin sandobansho isec tsadpondash. Adece tsadquin isquimbi aton na dadpen icquidën aton na bedtequid sando-sandonobi ⁴²aton na daëdpactsëcquidquo nianten choquimbi aton shocosh piucquid daëdquibictscquid sandopondash aton na utsi nibëdquiocnoc.

⁴³Adosho isun abëd icquido chomeshun Esusën nadopondash: —Abimbo chiembique. Tania. Nianten aton na bedtequid dayun uanu quenquioctscquid Nuquin Papa tantiaquiquin sandoquidquo nec utsibon aden sandoenquiocnobi.

⁴⁴Utsibon aton na bedtequid dadpen uesenquiocquin sandobededposh. Aido daëdpactsëc icquid sandoac bimboen sandoquido nec quequin tantiembi. Adquidpenquo nianten nec. ìBednun tedtsimbi dayunoape? quenquiocquin aton na daëdquibictscquid nibëdquiocnoc sandoposh nianten. Dadpen icquid sandoac bimboen sandosho aid isembi —quepondash Esus.

**Nuquin Papa tabadte shubu uashunaid
chic-chichte chiaid**

(Mat. 24.1-2; Duc. 21.5-6)

13 ¹Aden chianec Nuquin Papa tabadte shubu uashunaidën puduenubien: —Nuquin Papan shubu cuënote nacenaid bëdaidquo iqueque. Is, Icbo —quepondash abëd icquid abentsëc Esus caic.

²Adoquien: —ìNëd shubu dapa isecta ne? Shubu uaquin cuënote dapa tsindonëdaid mimbi nëbi isaid chic-chiac nibëdquidendac —quepondash Esus.

Abitedi naimbudte tauanun ismete chiaid*(Mat. 24.3-28; Duc. 21.7-24; 17.22-24)*

³Aden chiashe auëshquio nidanec macuësh Odibos caid yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aidted icpondash. Utsibon tantienquiocnoc aidon: ⁴—Cuënote nacenaid nebudte mimbi chuiboed ðmitsipadën nebudte icpeque? Tantianu. Èbi chui. Adembidi aidi tauanun ismete ðatotsi icoapeque? Tantianu. Aid chui —capondash.

⁵Adoquien Esusën nadopondash: —Muaquin chiaid tantiamane qeshun Nuquin Papan chiaid isban-isbanquiota. ⁶Nuquin Papan chomiaid nebi quec muaquid cho-choendac. Aid chosh, quequin chiac utsin-utsinquien, Abimbo caic, quequin tantiabededendac. ⁷Adecbidi cuesnancuededec quendac. Adembidi cuesnancuededosh, quequin chuituidsho tantiaoaindac. Aden chuituidsho tantiash dacuëndenda. Ad icnuc abitedi naimbudte ushë choabi iquendac. ⁸Ai, adquio iquendac. Adashic abëd tabadquidobëdi cuesnancuededendac. Adecbidi abi ancaquid dapan, Cuestan, quequin nidmiac nidaid utsin icquidobëdi cuesnancuededoaindac. Adecbidi utsi-utsiec yacno nidaid ishcludendac canchednuc. Adecbidi bunquiete iquendac. Aidtedi icsamboshëcquid taëyendac.

⁹“Adquid yanubi Nuquin Papan chiapadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo

ancaquid dapabo yacno buanaqui mimbi tantiaid Nuquin Papan chiaid mimbi chuibanendac. ¹⁰Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidën chuitiad. Aden chiabicnuc abitedi naimbudtiapimbo iquec. ¹¹Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ðatotsimbi cape? quequin mimbibi tantiec tsadenda. Nuquin Papan Mayanën mibi tantiamiacpadomboen mimbi chuibanendac.

¹²“Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tantiesa icquin aton papan chiaid niacquin adembidi aton titan chiaid niacoaquin cuesunemendac. ¹³Esus tantiaquid chieshënnquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquio yec unësash Nuquin Papa yacno nidacsho bëdambo icmiaid mibi iquendac.

¹⁴“Adnubien Nuquin Papa chieshënte ushë choendac. Aid chonoc Edusaden yacno abi chieshënnquid dapa choash, Nuquin Papa caid nebi, quiash Nuquin Papa tabadte shubu uashunaidën tsadendac. Adsho isash cuesunenushë quiashe anoentsëqui icquido cuenenquiocboedi ma cuempanuna. Abimbo chiembique. Bëdamboen tantiata caimbi. ¹⁵Adecbidi shubu macano pada-padapambo yacno tabadquido yec umanuc dectatote uaid dectandoaidën budanec con na bednu quenquio yec cuenta. ¹⁶Adecbidi aton tied nantan tabadquid yec aton dashcute

bëntsecquid chicshun dectanaid bednuec
bidiadenquio yec badedquio cuenta.

¹⁷Bacuë usunquid adecbidi bacuë
chishmequin buanquid badedquio
cuentiapimbocsho mëyampec. Adquid
tantiec utsibo unësquio icchitec. Nuquin
Papa chieshënte ushë icsamboshë
iquendac. Adnuc badedquio cuenta.

¹⁸Nuquin Papa chieshënte ushë icnuc
ma ue dapa sequenquiocpanuna,
quequin Nuquin Papa
chuided-chuidedta. Adoac ma badedquio
cuempanu. ¹⁹Comapenen Nuquin Papa
chieshënuquin abi tantiaquido icsa
uaquin mëyanendac. Yuen naindac.
Adoaidpadquid ënden nibëdondash.
Adecbidi adoaidpadquid nibëdendac.
²⁰Nuquin Papa ëmenuen chuideneta.
Nuquin Papa chuiquin, Chën, Papa,
mimbi cainquiocnoc matsested
nibëdtsiandac. Ëbi tantiaquid ambi
cuënaido tantiec, Chën, quequin Nuquin
Papan ëmendac. ²¹Nuquin Papa
chieshënte ushë icnuc, Nëid, Quidistu,
Nuquin Papan chomiaid neque. Isec cho,
quesho tantienquio icta. ²²Aid ushë
icnuc, Nuquin Papan chomiaid nebi,
quec muaquid dadpen cho-choendac.
Adecbidi, Nuquin Papan chuimaid nebi,
quec muaquid dadpembidi iquendac.
Nuquin Papan cuënaido ëbi tantiaquid
icmenu quequin abi chieshënuquidombidi
nadatiambocquin nabanendac. Adosho
isun ëbi tantiaquidëmbi utsin-utsinquien
tantiauidtsendac adquid. Nuquin
Papapenquio aid nec, quequin Nuquin
Papamob tantia. ²³Ad iquendac
quequin chiombique. Ad icnuc
chieshenquiocquin Nuquin Papan chiaid
tantiaquiota —capondash Esusën.

Nuquin Papan madombo choaid
(Mat. 24.29-35, 42-44; Duc. 21.25-36)

²⁴Aden chiash abi onquec:
—Adnubien Nuquin Papa chieshënte

ushë nidan inchëshquio yanendac.
Badiadën ushëbëdtabi inchëshën
chënquequid nibëdquiocnoc unës
uaindac. ²⁵Adecbidi uispa
paëdted-paëdtedendac. Adecbidi abuc
tabëcaid nibëdnuc ambo icquido
Satanasbëd icquido ïmitsimbo nuqui
cuempeba? quendac.

²⁶“Adnubien Nuquin Papan madombo
matsesaid ëbi choasho matsesën
isendac. Abu ushun nadatiambo yec
ushumbo yec bëdaidquio iquequi ëbi
choasho isendac matsesën. ²⁷Adnubien
Nuquin Papan uaido mayan bëdabo,
Ëmbi nidtan, cac nidanendac. Nuquin
Papan cuënaido bednuec nidaiddedi
yacno nidaneshun bedbanash ëbi
tsadacno choec, Bëombi, quetuidendac
bedtanec choquido —quepondash Esus.

²⁸Aden chiashic: —Abi chiembique.
Tantia. Suc seccuduquiac nëbi
cunquecuenec, quequin matsesën
tantiec. ²⁹Adomboembidi ëmbi
chuiamboed tauadosho isash Nuquin
Papa chieshënte ushë choeque. Ista,
quec chuinanta. ³⁰Abimbo chiembique.
Tantiata. Ëmbi chuiamboed
naimbudabien nuc ëmbi chuiamboed
tantiaquidën tsyuecquido
naimëdbudenquio iquendac. ³¹Aden
matsesën isnubien nidaibbëdi abu
ënëdendac. Ëmbi chiaiddedi abimbo yec
adquiouidi iquendac.

**Nëid ushënuquio tauadoendac,
quetiapimbo matses iquec quiaid**

³²“Adnuc nëid ushënuquio Nuquin
Papa chieshënuquin tauaindac
quetiapimbo matses iquec. Ambi uaido
mayan bëdabo adecbidi quetiapiambo
icoaic. Aton madombo yec adtiapiambo
iquebi. Nuquin Papa abentsëcquibien
adquid tantiaquid nec. ³³Aid tauadote
ushë choaid tantiatiapimbocquin
Nuquin Papan chiaid niacmane qeshun

isbanquin nabanta. ³⁴Nad iqueque. Tantia. Chuinu. Utsibo yacno nidnun abêd tabadquido naden chuiposh. Min utsibo chieshênênquiocquin shubu isquid icta quequin chianec nidposh. ³⁵Adec icbo nidan abi choate ushê mimbi tantienquio iqueque. Bêshunenquiocquin tantiaquiota. Inchêshbudtsêqui choapatsiash, quequin tantia. Adembidi inchêshpotsembo chopatsiash qeshun adembidi tantiaquiota. Adembidi, cachina cuêdanubi chopatsiash, qeshun isucunshun tantiadenequiota ³⁶êmibi tantienquiocnoc con icbo chochitondac, qeshun. ³⁷Adquiecbidi bédamboec tabadquin Nuquin Papan chiaid isted-istedta Nuquin Papa chieshênquidên niacmenushe qeshun —quepondash Esus.

Esus cuesunete bunaid chiaid

(Mat. 26.1-5; Duc. 22.1-2; Uan 11.45-53)

14 ¹Adashic, bëyuc tishaid unêsmenuequid aton shubu datamenuequin Isadaidbo tsusedpabon nidaidên capuquid yuaded cuesunepampic. Aid tantiaid ushêbêdtabi pan bidisquesa tantiaid ushê Pascuas caid daêdec ushash choendac. Aid chonoshe qeshun isadaidbo tsusiobon Esus nibêmbededpondash. ²Aden nibênenec: —Pascuas ushê tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash nêishun comapenen nuqui cuestasiashe —quepondash isadaidbo tsusiobo.

Esus unêsec qeshun nacbimboen noadte machiuinte chiaid

(Mat. 26.6-13; Uan 12.1-8)

³Adnubien Betania caid yacno tabadquin Esusên Simonên shubun

puduedshun pepondash. Simon daushacbimboecquid, nami mishac tantiadenquiocquid icsho Esusên bédamiaid nepondash. Adec puduedshun pec tabadnubi comapenec noadquid bëec chido puduedpondash. Piucquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchictanquin Esus chidon machiuimpondash.

⁴Aden machiuinsho isash utsibo nêishun: —¿Atotsieshun machiuino? ⁵Noadte menequin piucquid dadpen bedshun aton na nibêdquid dadpen menetsiandac —quec onquecuededpanêdash Esus machiuimboed chido chushcaic. ⁶Aden chushcasha tantiashien Esus onquec nadpondash: —Chushcainda. ¿Mitsanada nediosh? Ambi noadte machiuimboed bédaidquio nec. ⁷Badiadquidên-badiadquidênquiec ênêdenquio yec aton na nibêdquid ênabi iquec. Aidi menenu qeshun mimbi menepec. Êbien nashuntiapimbo iquendac. ⁸Êbi unêsabicnuc nêid chidon tantiaquin chococanuequin nacbimboen noadte machiuimpaboc. ⁹Abimbo chiembique. Tantia. Nuquin Papan shubu abentsêquên tabadaid chuiquimbi êbi machiuimboedên naidtsen tantiaquidon chuiben-chuibenendac —quepondash Esus.

Esus bedmembali, Udas quiaid

(Mat. 26.14-16; Duc. 22.3-6)

¹⁰Adnubien Udas Iscadiote, Esusbêd icquid abentsêc, Esus bedmenu, quianec isadaidbo tsusiobo yacno nidpondash.

¹¹Adec nidequi isadaidbo tsusiobo yacno choshon Esus mibi bedmembali quequin chuituidac bédambo icpac caondash aido. Adembidi: —Esus êbi bedmesho isun piucquid mibi menembali

—quecuededpac caondash. Adsho tantiash nidanec, ¿Mitsipadentsimbi bedmepe? quec tabadquin caimpac caondash Udasën.

Nidaidën capuquidded cuesuniaid abëd icquidobëdtan piaid

(*Mat. 26.17-29; Duc. 22.7-23; Uan 13.21-30; 1 Cod. 11.23-26*)

¹²Adashien penun isadaidbo utsibon nidaidën capuquid cuesunenubien:

—Cuesuniaid pambid penu queshun, ¿mitsishunquiembi nacenmpatsia? —quepondash Esusbëd icquido.

¹³Adsho tantiash Esus abëd icquid daëd chiec nadpondash: —Edusaden yacno nidquimbi dadan acte bësho istuidash tsibananec aidbëdi nida.

¹⁴Aden aid tsibanec puduedash, ¿Ëbi tabadte quënë mitsimbo iquec? ëbëd icquidobëdtan penu, quiosh chuiquid, quequin shubu icbo chuita. ¹⁵Aden chiac buanshun decatomesun abuc quënë dapa mibi ismendac. Ambo pete sante cuate iquendac. Ashunquo penun nacenata —quepondash Esus ambi daëd chuimiad caic.

¹⁶Aden chiac abëd icquid daëd Edusaden yacno nidquin Esusën chiacpadomboen bëquedshun tsibananash puduedshun penun nacenmpondash.

¹⁷Adnubien inchëshbudtsëqui aid daëdtsëqui yacno Esusbëd icquid utsibo chopondash. ¹⁸Adec choash pec tabadnubien: —Abimbo chiembique. Tanta. Ëbëdtan pequid abentsëcshun isadaidbo tsusiobo ëbi bedmendac —quepondash Esus.

¹⁹Adsho tantiash, Icsambo iquec, quequin tantiec: —¿Ëbida chienquo ique? —quepondash abëd icquidtedi.

²⁰Adoquien: —Mibëd icquid nebi, quec mibitedi. Padnuen abentsëcshun ëbëdtambi pete cuëshën ënë punshun

pequidën ëbi chieshënquido bedmendac. ²¹Nuquin Papan chuimiapadomboen aton madombo chidon tishac masesaid ëbi unës uate anentsëqui yanec. Ëbi bedmequid icsamboshë iquendac. Abi cuidte icsamboshë icnushe queshun aidi tishenquiocpatecnëdan —quepondash Esus.

²²Adashic pebededquin pete bedshun Nuquin Papa chiec onquetanquin pete cuësh-cuëshun abëd icquido menebanquin: —Nëid pete cuëshë ëmbi piaid con dadabëd daëdacpadquiec Esus unësash abi tantiaquid ëbi icnuc Esus ëbëdi iquec quequin tantiata —capondash Esusën.

²³Adembidi dëshote bedshun uba caid actequid icnuc Nuquin Papa padpiden chuishun abëd icquido menebanac acpondash.

²⁴—Nëid acquin Esusded Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquo iquec quequin nëid acquin tantiata. ²⁵Uba caid ënë nidaidëshun padpiden aquenquiocquimbi Nuquin Papan shubunshun actequid chuca mibëdtambi aquendambi —quepondash Esus abëd icquido caic.

²⁶Aden chiasn Nuquin Papan naid chiec cuëdënanec macuësh Odibos caid yacno nidoapondash.

Esus tantiesa nebi quequin Petedon chuite chiaid

(*Mat. 26.30-35; Duc. 22.31-34; Uan 13.36-38*)

²⁷Adshumbic Esusën: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tanta, mibi.

“Abi tantiaquid bëyucanquin yuedquid unës uaimbi. Adosho

isash abêd icquido cuenec
cuëshêd-cuëshêdendac,”
quequin Nuquin Papan chuipampid nec.
²⁸Unês uac uincuenash Cadidia yacno
ëbia nidoaindabi. Mibitsen ambo nidta
—capondash Esusën abêd icquido
chuiquin.

²⁹Adoaquien: —Esus tantiaquid nebi
quenquo utsitedi icnuc ëbien
padenquo iquec —quepondash Petedo.

³⁰Aden Petedon chuisho tantias: —Abimbo chiembique. Tanta. Nêid
inchëshêmbi cachina bënë daêdec
cuêdanabicnuc Esus tantiesa nebi,
quequin mimbi tedesteden chiendac
—quepondash Esus Petedo caic.

³¹Adsho tantias: —Esus tantiaquid
mibi icsho mibi aibdêdta unês uaimbi,
cac, Esus tantiesa nebi, quenquo
iquendabi —quepondash Petedo
comapenec onquec. Adecbidi Esusbêd
icquidtedi onquepondash.

**Quetsemani caid yacno choash
tabadaid chiaid**

(Mat. 26.36-46; Duc. 22.39-46)

³²Adashic cuête odibo caid dadpen
icsho Quetsemani quequin cuênacno
choash nidtuidash: —Nuquin Papa
chuinuec udi nidebique. Nêmbobi tabad
—quepac caondash Esus abêd icquido
caic.

³³Aden chianec Petedo, Acobo, Uan
nêidted cho quianec bëyucanec nidec
Esus, Matsestedi icsaid cuidtequid ëmbi
bedshunsho isun Nuquin Papan ëbi
istiapimbo iquec, quequin tantiec
unêsquioshê yampondash. ³⁴Adquo
iquec: —Ëbibi unêsquioshê yec uidictsêc
nidebi. Chieshtomane queshun nêmbobi
tabadquin Nuquin Papa chuiban
—quepac caondash Esus ambi nêid
3ted, Cho, caboed chiec. ³⁵Aden chianec
uidictsêc nidash Nuquin Papa chuinuec
nidaidên uebudash uec onquec:

—¿Adabi adquid icmenquioctsia? Papa
—quepac caondash Esus Nuquin Papa
chiec. ³⁶Aden chuishumbic: —Papa,
mimbi natiapimbo ictequid nibêdec.
Adquid icquin matses cuidtequid
bedshunquid con mado icmenquo
iquembi queshun mimbi
adoenquioctsiandac, Papa. Ëbi
bunacpaden nainquiocquin mibi
bunacpadomboen nata, Papa —capac
caondash Esusën Nuquin Papa chuiquin.

³⁷Aden chiasch choquin abêd choboed
3ted icquid usho istuidec Petedo caic:
—Simon, ¿ushecta ne? ¿Ëbibi
chieshmane quiasch yuecpactsêc iquec
ushenquo yec tabadtiapimboda icco?
³⁸Chieshmane queshun Nuquin Papa
chuita Nuquin Papan chiaid
niacmenuequidên Satanac caidên chiaid
tantiamane queshun. Chieshenquo
iquebi quiasch dacuêdash badedquo mibi
chieshendac —quepac caondash Esus.

³⁹Aden chiasch ambi Nuquin Papa
chuibocno nidoashun ambi
chuibocpadembi Nuquin Papa Esusën
chuiuoapac caondash. ⁴⁰Adtanec
choashumbic abêd choboedo adecbidi
ushacsho istuidoapac caondash.
Ushcasquiec tabadec, Ushenquioccobi,
quequin chuitiapimbo yec otacquo
tabadpac caondash.

⁴¹Adnubien padpidec nidoashun
Nuquin Papa chuioatanec choec:
—¿Uimabudashta tiboquec ushec ne?
Padi. Ushenquo yec isucun. Nuquin
Papan madombo chidon tishac matsesaid
ëbi icsho nêbimbobi ëbi chieshênquidon
bedmeque. ⁴²Nidtoash ëbêdi nid. Ênden
choaye. Is —quetuidpac caondash Esus
abi bednuec choquido isec.

Esus bedshun buante chiaid
(Mat. 26.47-56; Duc. 22.47-53; Uan 18.2-11)

⁴³Aden chuinubien Esusbêd
icboedquibi Udasbêd matses dadpen

cho-chopondash. Cho-choquid utsi-utsiec chështe sanampamboec chonobi utsi cueste sanampamboec chopondash. Aided Udasën chiac isadaidbo tsusiobon chomiaido nepondash.

⁴⁴Esus bednuequid tantiamenuen ambiabi Udasën: —Ëmbi tanchoccaid mimbi bedtequid nendac. Aidquiobi bedshun buanta. Cuenushe qeshun bëdamboen ista —capac caondash. ⁴⁵Aden chiashic aidobëdi choquimbi: —Icbo —quequin Udasën Esus tanchoccatuidpondash.

⁴⁶Aden Udasën tanchoccasho isun Esus bedpondash. ⁴⁷Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

⁴⁸Adnubien: —¿Cuesanquid Esus nec, qeshun utsin cueste sananubi utsibon chështe sananec ëbi bedecta cho-choec ne? ⁴⁹Badiadquidën-badiadquidënquiec Nuquin Papa tabadte shubu uashunaid umanuc daquënë uaidën tabadquin matses tantiamenuen chuibaniombi mibitedi tabadnubi. Ambo icshobi ¿atotsieshumbini mimbi bedenquiocpo? Nuquin Papan chiapadomboen nëbi mimbi ëbi bedec, —quepondash Esus abi bedquido caic. ⁵⁰Adec onquesho tantiashun cuenquin abëd icquidtedishun Esus niampondash.

⁵¹Adec cuenubini nëbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshënnquidon bedpondashi. ⁵²Aden bedac dasiuidte bëdaidquo nianec dadauidquo cuempondabi.

Isadaidbo tsusiobo iccuededacno

Esus buante chiaid

(Mat. 26.57-68; Duc. 22.54-55, 63-71;

Uan 18.12-14, 19-24)

⁵³Adnubien, isadaidbo tsusio dapa, matses tantiec Nuquin Papa chiec

onquequido yacno Esus buampondash. Aden buanec puduednu quiacnombobi isadaidbo tsusiobo utsibo iccuededec tabadpondash. ⁵⁴Aden Esus buanubi tsyuec choquin Petedo cuemboedën tsibananec isadaidbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuëte cuëc tsadpondash Petedo. ⁵⁵Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash. ⁵⁶Abimbo chiacbimboen dadpenshun chuibededpondash. Aden chuiquin abentsëcshun chiapadomboen chienquiocquin utsin chuiopondash.

⁵⁷Adnubien, Chuinu. Tantia, qeshun Esusën chiacbimboen utsi uain chuipondash utsibon. ⁵⁸Aden chuinubien utsi onquec: —Naden Esusën chuisho tantiombique. Tantia. Chuinu. “Nëid, Nuquin Papa tabadte shubu uashunaid chicbanendambi. Aden chicbanshumbic daëdec ushquin matsesën naidpenquo isadnuc ëmbibi naindambi,” quequin Esusën chuipondash —quepondash utsi. ⁵⁹Aden abentsëcshun chuinubi utsin aden chienquiocquin chuipondash.

⁶⁰Aden chuisho tantiash isadaidbo tsusio dapa nënantanquo nidtoash nidquin: —¿Mimbi chiapadomboen chiecta nec? ¿Abimbo chuiquidta nëidtedi neque? Chui. Tiantianu —capondash isadaidbo tsusio dapan Esus chuiquin.

⁶¹Adsho tantiash ëcbedenquo yec otacquo nidsho isash: —¿Nuquin Papan chomiaidquo, Quidistu caid, Bëdambocquidën mado nebi, quecta mibi ique? —queoapondash isadaidbo tsusio dapa Esus caic.

⁶²Adoaquien Esus: —Ai, aidi nebi. Nuquin Papan madombo matsesaid abuc nidoashic Nadatiambocquidën dayun abiucquio tsdash abu ushun ëbi chosho matsesën isendac —quepondash Esus.

⁶³Adsho tantiash, Icsamboen chiec, quec abi daëd dasiuidaid bëntsecquid dached-dachedquiash: —¿Atotsieshun Esusën icsamboen naosh, quequin chuimenuen utsi nibëmpe nuqui?

⁶⁴Nuquin Papa icsamboen Esusën chuisho mimbi tantioc. ¿Midapaden mimbi chieque? Tantanu. Chui —capondash isadaidbo tsusio dapan tsusio utsibo chuiquin.

Adoaquien: —Icsambo iqueque. Unës uametiad —quecuededpondash.

⁶⁵Adsho tantiashun Esus dacuishtuquin utsibon tauapondash. Adotanquin dashcuten bëpucshun ambibi cuestanequi: —¿Tsuntsin mibi cuesposh? Comapenen tantiaquidquo mibi neque. Ëbi chui. Tantanu —capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

Esus ëmbi tantiacmaidquo nec quiaid
(*Mat. 26.69-75; Duc. 22.56-62;*
Uan 18.15-18, 25-29)

⁶⁶Adnubien Petedo umanuc daquënë uaidën tsadnubi isadaidbo tsusio dapan yua chido chopondash. ⁶⁷Choshon Petedo cuëte cuëec tsadsho isun: —Nasaded caid yacnocquid Esusbëd icquid mibi nec —capondash.

⁶⁸Adoaquien, Esusbëd icquid nebi, quetiapimbo yec Petedo: —¿Atotsi mibi quepe? Tantienuo yec tsadebi —quepondash.

Adtanec puduedte shëcuë anoentsëqui nidtuidash tsadnuc cachina bënë cuëdpondash.

⁶⁹Adec Petedo ambo tsadsho chido yuaidën istuidtanquin padpiden: —Esusbëd icquidquo nëid nec —quequin anocquido chuiopondash.

⁷⁰Adoaquien: —¿Aidbëd icquidtabi nedi? —quepondash Petedo.

Adnubien yuecpactsëc yash: —Aidbëdi Cadidia yacnocquid mibi nec —quepondash ambobidi tabadquido.

⁷¹Adoaquien: —Ëmbi tantiacmaidquo nec quequin abimbo chiemi. Ëmbi abimbo chienquo icscho ma ëbi chian anëdënquiacno Nuquin Papan nënapanuna —quepondash Petedo comapenen chiec.

⁷²Adnubien cachina padpidec cuëdpondash. Adsho tantiashun, “Cachina daëdec cuëdabincuc ëmbi tantiacmaidquo Esus nec, quequin mimbi chiendac tedestedec onquequin,” quequin Esusën chioshi quequin tantiec unësquo yanec shubianquiopondash Petedo.

Pidato yacno nidshun Esus meniaid
(*Mat. 27.1-2, 15-31; Duc. 23.1-5, 13-25;*
Uan 18.28-19.16)

15 ¹Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqueshun Esus mëtaneshun buanshun isadaidpembro ancaquid Pidato caid menepondash. ²Aden meniac Pidato: —¿Isadaidbo ancaquidta mibi neque? Ëbi chui. Tantanu —capondash Pidaton Esus chuiquin.

Adoaquien: —Mimbibi aden chuipayoc —quepondash Esus.

³Adnubien, Esus icsaded-icsadedosh, quequin chiec isadaidbo tsusiobo onquecuedednuc cuëdenquo yec Esus tsadpondash. ⁴Adec tsadsho isun:

—¿Ëcbedanenquio yec otacquioda tsade? Mibi icsaid dadpen nëidon chuibanec —Pidaton caqui ⁵adquiecbidi Esus tsadpondash. Adec tsadsho isash ¿Mitsipadquidquio Esus nepec? Utsimbien, Icsapenquiocquid nebi, quequin chuipec, Aden chienquio Esusën iquec, quequin ambibi tantiec Pidato tsadpondash.

⁶Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënën nauedmiaid abentsëc nidmenu. ¿Mitsiquidimbi nidmepeque? Chui. Tantianu, quequin isadaidbo Pidaton chuided-chuidedpadenec. Adoquien ismequin, Nëid nidme, cac nidmedenepadenec. ⁷Aden chuidenequin ambi quënën nauedmiaid Badabas cuëmëdquid nepondash. Aidëmbi utsibobëdtan Domanobo bunenquiocquin cuesquin tauasho isun bedmeshun quënën nauedmepac caondash. ⁸Adnubien Pidaton seta utsin quënën nauedmiaid abentsëc ambi nidmiondacadpen nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quënën nauedmiaid abentsëcta mimbi nidmepatsia —quecuededpondash aido Pidato caic.

⁹Adec onquesho tantiash Esus nidmetiadquiocquin Pidaton: —Mibi ancaquid caid, Esus, nidmependambi iqueque. Isadaidbon, ëbi chui. Tantianu —capondash. ¹⁰Esusbidi tsusio icpec mates quenushe quiash isadaidbo tsusiobo Esus unës uate bumpec quequin tantiaquin Pidaton aden chuipondash. ¹¹Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash

aton tsusiobon chiacpadomboen. ¹²Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidaton.

¹³Adoquien: —Cueste nitsinshun dectan —quec comapenec cuëdcuededpondash isadaidbo.

¹⁴Adoquien: —¿Atotsi icsa uaosh? —quepondash Pidato.

Adoquien: —Cueste nitsinshun dectan —queoac comapenec cuëdcuededpondash.

¹⁵Adsho tantiash Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushe queshun Badabas nidmepondash. Adshumbic: —Cueshcaten Esus comapenen cuesmebededshun cuesten dectanun buanec nid —capondash Pidaton sondado chuiquid chuiquin.

Sondadon Esus mamënshumbedaid chiaid

¹⁶Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash. ¹⁷Choshon dashcute abichobicquid bëdaidquio bedshun ancanquid dasiuidac bimboecnuc dasiuiinshun pinchuc-pinchucquid mauete uashun Esus matoncashun ¹⁸ancanquid cuënacpaden cuënëc: —Mibi isash bëdambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado. ¹⁹Adoquimbi ancanquidën sanante cueste bëdaidquiobimboecnuc sananquin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash

uepondash. ²⁰Aden mamëshumbededquin mëyanshun dashcute bédambocquid ambi dasiuiamboed dachicshun aton dashcutebi dasiunshun cuesten dectanuequin Esus buampondash.

Esus cuesten dectante chiaid
(*Mat. 27.32-44; Duc. 23.26-43;*
Uan 19.17-27)

²¹Aden abi dectante cueste Esusën buantiapimboconoc nidquimbi abi datanquid cueste chiadtometanquin buamepondash sondadon. Abi datanquid Sidene caid yacnocquid nëbi Edusaden caid dëuequiacnoësh choquid nepondash. Adecandedo, Dupo chedon papa Simon cuëmëdquid niondash.

²²Aden cueste Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota quequin isadaidbon aton onqueten cuëmpondash. ²³Ambo choshon uba sicaid paëacsho paëmbocquid dauë cacushtanquin meniac aquenquiocondash Esusën. ²⁴Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tēchun sandoshon cadotanequin dada uatsaidēmpi puduemaiid isbanquin Esusën dashcute bedbampondash.

²⁵Ushë dectatoec 9 yanuc Esus cuesten dectampondash. ²⁶Esus dectanaid mapino dada uaid cueste podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiacpaden dada uaid nepondash. ²⁷Cuesunetanquin ampequid daëd ēquë dectambudcuenshun nënantanquio Esus dectampondash. ²⁸“Dectanquin

icsaquidbēdta dectanendac,” quequin Nuquin Papan chuimiampicpadembi napondash. ²⁹Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamëshumbededpondash. Adec cuenquin mamëshunquin: —Nuquin Papa tabadte shubu uashunaid chicbanshun daëdec ushquin chuca uaimbi, quequin chiec mibi onquiondaque. ³⁰Abimbo chuiquid yec unēstiapimbocquid nebi quianec mibibi budta —cabidanepondash.

³¹Aden cuenquidën chuinubi ademibidi isadaidbo tsusio dapabotedi tsusedpabon nadomboen nata quequin chiaid tantiamequid chedo onquecuededec: —Utsi-utsien bēdamequimbi utsi unēsacsho uincuemboed yec mētoccaad abembi chiquidtiapimbocquid nec —quepondash isadaidbo tsusiobo Esus caic. ³²—Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiendambi —quepondash. Aden cuenquidën mamëshunubi abēdta dectanaidën ademibidi chuiopondash.

Esus unēs uate chiaid
(*Mat. 27.45-56; Duc. 23.44-49;*
Uan 19.28-30)

³³Adnubien ushë cuembocnoc 12 yanan inchëshquio icboedi ushë budec 3 yanuc uëshëmbo yanoapondash.

³⁴Ushë 3 yanuc: —Eloi, Eloi, ðlama sabactani? —quequin aton papa chiec Esus comapenec cuëdpondash. Aton onqueten: Papa Edoen, ðatotsieshumbini biadiadquin isenquio ique? quec adpondash Esus.

³⁵Aden Nuquin Papa Esusën chuisho tantiaquido, Nuquin Papa cuënec,

quenquo yec: —Edias cuëneque. Tanta —quepondash.

³⁶Aden tantianubi badedi titinqeshun sicaid mucambocquid nēcushtanquin puntanquin cuate dēdectanshun acmenuequin ēccuēscadonequi: —Chiata. Edias Esus bedec chonoshe caimbono —quepondash.

³⁷Adnubien comapenec cuēdec Esus unēsbudpondash.

³⁸Esus unēsbudnubi abi inchēshacimboecnubi Nuquin Papa tabadte shubu uashunaid quēnē uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daēdquio yec. ³⁹Adec Esus cuēdbud-cuēdbudec unēsō isash: —Abimbo chuiquid niosh. Nuquin Papan madombo nēid nec —quepondash sondado chuiquid uquē tsadbudec.

⁴⁰Adnubien ancuenquo isec chidobo nēidtedi tabadpondash: Madia Mactada caid yacnocquid; Madia utsi, Acobo bushcuctsēcquidēn tita, aidi Osen tita nepondash. Utsibic Sadome nepondash. Aidon Esus ancuenquo diadsho isbededpondash. ⁴¹Aidon Esus Cadidia caid yacno capusho isun abi nashumboedo nepondash. Aidobēdtan isquido chido utsibo Edusaden yacno choshon Esus buansho isun tsibanquido icpondash.

Esus chococate chiaid

(Mat. 27.57-61; Duc. 23.50-56; Uan 19.38-42)

⁴²Adashic biednes ushē budtsambi: —Inchēshbudtsēqui seis icnuc chonoadtemaid ushē chonoshe Esus unēsoshe chococatanu —quianec Esus tantiaquid utsi nidpondash. ⁴³Aidi, Ose Adimateya caid yacnoshon tishaid

Pidato yacno nidpondash. ⁴⁴Adec nidshun: —Esusēn dada bedshun chococatiadquio iquebique. ¿Ada buantan mibi quepe? —caquien, ¿Ēndenda unēsaccosh? quequin tantiesa icquin sondado chuiquid Pidaton chomeshun: —¿Ada Esus unēsosh? —capondash.

⁴⁵Adoac: —Ai —quesho tantiashun: —Ai, bedshun buanta —capondash Pidaton Ose chuiquin.

⁴⁶Adoac nidshun unēsaid dabidiate bedshun Esusēn dada imbudshun dataneshun macuēsh dapa cuēnote shēcuē uaquin ambi nacnenaidēn nauedshun cuēnote dapan bētashpondash. ⁴⁷Aden Osen Esus chococasho Madia Mactada caid yacnocquidbēdtambi Madia, Ose utsin titan ispondash.

Esus uincuenta chiaid

(Mat. 28.1-10; Duc. 24.1-12; Uan 20.1-10)

16 ¹Aden isashic sabado chonoadtemaid ushē inchēshbudtsēqui seis icnuc naimēdnubi Madia Mactada yacnocquid; Madia, Acobon tita; Sadome aidtedi nidshun aton na bedtequid menequin comapenec noadte dadpen bedpondash Esus danoshcanuequin. ²Bedtsash badiadtsēcnuubi dominco ushē caidēn Esus chococacno nidanequi: ³—¿Tsuntsin cuēnote shēcnepeba? —quec onquecuededpac caondash.

⁴Adec onquequin ancuenquo isquien cuēnote ēnden shēcniac. Cuēnote dapa yuēmboquid nepondash. ⁵Aden isequi nidash chococaid shēcuēn puduedquin isaquien dada nēbi caniaid dashcute ushumbocquid dasiuidash abiucquio tsadpondash. Aidi isash dacuēdcuededec tabadpac caondash chidobo.

⁶Adec dacuēdec tabadsho isun: —Dacuēdenquo yec tabad. Esus

cuesten dectanaid mimbi nibënaid tantiembi. Uincuenash nidac. Nëmbobi nanac ueuidoshe. Is. ⁷Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquio utsibobëdta chuituidec nid —quepondash nëbi caniquid chidobo chiec.

⁸Aden chuisho tantiash uëdëquequi chococaid shëcuënuësh puduenanec titinquec dacuëdec onquenquio yec nidanepac caondash chidobo.

Esus abuc indote chiaid

(*Mat. 28.16-20; Duc. 24.13-53;*

Uan 20.11-23)

⁹Adnubien abi nibëmboed uincuenshun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash.

¹⁰Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash. ¹¹Esus uincuenash capusho isombi, Madia quesho tantiash, Aidquio mimbi isambo iquec, quec tantienquio yec tabadcuededpondash.

¹²Adashic tantienquio yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën. ¹³Aden ismiac aid daëdi aucbidi Edusaden yacno nidshun ambi isboed chuiopondash. Adembidi tantienquio icoapondash utsibon.

¹⁴Adashic, abëd icquidquio 11ted pete sante cuesten tabadnubi Esus

chopondash. Adec choshon: —Uincuenac quequin ëbi isquidon chiaid tantienquio mimbi icpoc. Chobique. Is —capondash Esusën.

¹⁵Adashic: —Nëbi nidaiddedi yacno nidaneta. Adec nidshun Nuquin Papan shubu abentsëquën tabadtequid iquec, quequin matestedi mimbitsen chuiban.

¹⁶Aden chuisho tantiaquid, Ëbi cuidenquiocquin Esused Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimbocnoc. ¹⁷Abi tantiaquid utsi-utsien Nuquin Papan nadatiambocquin nabanquid icmendac. Adquid icmiaidën ëmbi nacpaden mayan icsa dapuduemendac. Adembidi, utsi onquiaid tantienquiocboedëmbi tantiaquin ëbi chuibanendac. ¹⁸Adecbidi, nisinquio piaqui bidisquenquio iquendac. Adecbidi, unësmenuequin acmiaqui unësenquio iquendac. Adembidi, utsi unëstsensho mishac bëdanendac. Nuquin Papan nadatiambocquin namiaidënquio adobanendac —quepondash Esus.

¹⁹Aden chuiquin ënacsho Esus abuc buanaqui Nuquin Papan dayun abiucquio Esus tsadtuidpondash.

²⁰Ambo tsadquimbi nadatiambocquin namiac nidaidën tabadquimbi abëd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepondash nadatiambocquin nabanquimbi.

Ëmbi abimbo chuibodquio mimbi isec aidquio tantianeta. Padi. Aiddedi dada uaombi.